

MESYUARAT KETIGA, PENGGAL KEDUA
PARLIMEN KEEMPAT BELAS
2019

HARI RABU : 23 OKTOBER 2019

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGKAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : TUAN TAN KOK WAI
[CHERAS]
TARIKH SOALAN : 23 OKTOBER 2019

SOALAN NO. 1

minta **MENTERI PEMBANGUNAN USAHAWAN** menyatakan tindakan Kerajaan untuk merencanakan perkembangan ekonomi dan membantu pengusaha perniagaan kecil-kecilan dalam waktu yang mencabar ini.

JAWAPAN

Tuan Yang di-Pertua,

1. Kementerian Pembangunan Usahawan (MED) peka dan prihatin terhadap kesejahteraan usahawan mikro dan kecil dalam mengharungi cabaran ekonomi masa kini. Melalui Dasar Keusahawanan Nasional 2030 (DKN 2030), pelbagai strategi dan inisiatif dasar telah digariskan untuk mempertingkatkan dan memantapkan keupayaan usahawan.
2. Bagi mengatasi cabaran ekonomi masa kini, antara usaha yang telah dilaksanakan di bawah MED serta bantuan khusus kepada golongan usahawan mikro dan kecil adalah seperti berikut :

(i) Kemudahan akses kepada pembiayaan

TEKUN Nasional telah menawarkan pelbagai skim pembiayaan mikro kredit kepada usahawan dengan nilai pembiayaan yang bermula RM1,000 hingga RM100,000. Bagi tahun 2019, TEKUN telah menyalurkan pembiayaan berjumlah RM248.6 juta kepada

NO. SOALAN: 1

18,724 orang usahawan. Melalui Skim Pembiayaan Usahawan Masyarakat India (SPUMI), sehingga Oktober 2019, sejumlah RM10.81 juta telah disalurkan kepada 568 usahawan India dan disasarkan seramai 1,300 orang akan menerima manfaat dengan jumlah peruntukan sebanyak RM20 juta.

Di samping itu, TEKUN Nasional juga sedang melaksanakan program pembangunan usahawan dalam bidang kemahiran khusus seperti ukiran kayu dengan pembiayaan kepada 9 usahawan sebanyak RM285 ribu dan fertigasi pertanian di bawah projek PRINT di Terengganu dengan pembiayaan kepada 20 orang peserta sebanyak RM400 ribu.

Bank Rakyat juga telah menawarkan kemudahan pembiayaan bagi menyokong pembangunan usahawan mikro. Antara program pembiayaan di bawah Bank Rakyat adalah seperti **Modal Usahawan Kecil (MusK)** dan **Micro Enterprise Fund (MEF)**. Menerusi skim pembiayaan ini, sehingga September 2019, seramai 7,024 orang usahawan telah menerima manfaat dengan pembiayaan berbaki RM84 juta.

Selain itu, SME Bank juga menyediakan Skim Jaminan Pembiayaan Perniagaan (SJPP) sebanyak RM500 juta kepada SME yang mempunyai kapasiti untuk mengeksport.

(ii) Penyediaan latihan secara khusus dan berstruktur

MED melalui SME Corp. Malaysia telah melaksanakan **Program Rangkaian Mikro (Micro Connector)**. Program pembangunan kapasiti ini disediakan kepada usahawan mikro di peringkat permulaan untuk memulakan dan menjalankan perniagaan. Sehingga September 2019, sejumlah 5 syarikat telah dilantik bagi melatih dan menyediakan perkhidmatan kepada B40/usahawan mikro dengan seramai 18 orang peserta B40 telah menerima manfaat.

Selain itu, inisiatif lain adalah di bawah INSKEN melalui program pembangunan kapasiti seperti **kursus latihan keusahawanan jangka pendek (outcome-based)** yang menekankan tentang

NO. SOALAN: 1

teknik pemasaran dengan penggunaan platform sosial media dan **program berbentuk *coaching* serta *mentoring*** dalam beberapa bidang.

(iii) Penyediaan kepelbagaian akses pasaran

Pada tahun 2019, MED telah menganjurkan **pelbagai program berbentuk showcase dan pemasaran seperti Program Satu Daerah Satu Industri (SDSI), Fiesta MED dan Program Minggu Usahawan Nasional (MUN 2019)**. Program ini telah menyediakan platform promosi dan pemasaran kepada usahawan untuk mengetengahkan dan memperkenalkan produk/perkhidmatan mereka kepada orang awam.

Semasa program ini berlangsung, MED telah **mengaturkan sesi padanan perniagaan antara *anchor* tempatan terdiri daripada peruncit, pemborong, pasaraya besar dan koperasi dengan para usahawan**. Sesi ini membolehkan produk dan perkhidmatan usahawan dipasarkan melalui kedai-kedai runcit, kedai serbaneka, pasaraya, *hypermarket*, dan koperasi tersebut.

Antara hasil pelaksanaan program adalah seperti berikut :

- a) SDSI Perak telah mencapai potensi jualan sebanyak RM4.4 juta;
- b) SDSI Zon Timur sebanyak RM6.95 juta;
- c) SDSI Zon Selatan bersempena Fiesta MED sebanyak RM9.85 juta; dan
- d) SDSI Nasional bersempena Minggu Usahawan Nasional (MUN) 2019 sebanyak RM28.21 juta; dan
- e) SDSI Sabah sebanyak RM5.4 jua..

Selain itu, terdapat juga kerjasama yang dilaksanakan di antara pelbagai Kementerian dan agensi bagi menyediakan akses pasaran kepada pengusaha perniagaan-perniagaan kecil sebagai contoh penganjuran Karnival Usahawan Desa oleh Kementerian Pembangunan Luar Bandar, Malaysia Agriculture Horticulture Agrotourism (MAHA) oleh Kementerian Pertanian dan Industri Asas Tani dan sebagainya.

PEMBERITAHUAN PERTANYAAN BAGI JAWAB LISAN
DEWAN RAKYAT, PARLIMEN MALAYSIA
PARLIMEN KEEMPAT BELAS

PERTANYAAN : JAWAB LISAN
DARIPADA : DATUK AARON AGO DAGANG
[KANOWIT]
TARIKH : 23 OKTOBER 2019

SOALAN :

Datuk Aaron Ago Dagang [Kanowit] minta **MENTERI LUAR NEGERI** menyatakan jumlah rakyat dari Sarawak yang bekerja dengan pelbagai syarikat (pembalakan, pembinaan, minyak & gas) di luar negara (seperti di Solomon Island, Surinam, benua Afrika dan Arab). Adakah Kerajaan sedar selalunya berlaku masalah di antara pekerja dan majikan yang akhirnya membebankan Kerajaan dan wakil rakyat.

JAWAPAN :

Tuan Yang di-Pertua,

Saya mengucapkan terima kasih kepada Yang Berhormat Kanowit atas pertanyaan yang dikemukakan.

Tuan Yang di-Pertua,

2. Seperti mana Dewan yang mulia ini sedia maklum, di antara tugas dan tanggungjawab Kementerian Luar Negeri ialah memastikan hak dan kebajikan rakyat Malaysia yang berada di luar negara sentiasa terjaga dan terpelihara. Pejabat Perwakilan Malaysia di luar negara sentiasa bersedia memberikan perkhidmatan atau bantuan konsular kepada warganegara Malaysia yang memerlukan atau menghadapi masalah di luar negara.

3. Untuk makluman Dewan yang mulia ini juga, Kementerian tidak mempunyai rekod secara khusus tentang jumlah rakyat Malaysia daripada Sarawak yang bekerja di luar negara. Walau bagaimanapun, bagi tahun ini, sehingga bulan Julai 2019, terdapat seramai 35,783 orang rakyat Malaysia yang telah mendaftarkan diri dengan Pejabat-pejabat Perwakilan Malaysia di luar negara.

Tuan Yang di-Pertua,

4. Kerajaan sentiasa prihatin terhadap isu-isu yang dihadapi oleh rakyat Malaysia di luar negara tanpa mengira negeri asal mereka. Dalam hal ini, Kerajaan sentiasa menekankan supaya rakyat Malaysia yang ingin bekerja di luar negara agar berhati-hati dengan tawaran kerja yang diberikan, memahami kontrak yang dikemukakan dan memastikan undang-undang tempatan, termasuk undang-undang buruh sedia ada dipatuhi sewajarnya. Ini penting bagi mengelakkan mereka daripada menjadi mangsa penipuan atau ditimpa masalah di kemudian hari. Dalam hubungan ini juga, Kerajaan sentiasa menggalakkan rakyat Malaysia untuk berdaftar dengan Pejabat Perwakilan Malaysia sebelum bertolak ke luar negara.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : **LISAN**
DARIPADA : **TUAN PANG HOK LIONG**
[LABIS]
TARIKH : **23 OKTOBER 2019**
[RABU]

SOALAN NO. 3

Minta **MENTERI PERUMAHAN DAN KERAJAAN TEMPATAN** menyatakan memandangkan operasi sindiket ceti haram atau 'Ah Long' ganas dan berbahaya semakin meningkat setiap hari dan ramai telah menjadi mangsa sindiket, sama ada pihak Kementerian akan menggubal Akta Pemberi Pinjam Wang 1951 untuk mengenakan hukuman penjara mandatori dan penyitaan/ pelucutan hak semua harta-harta alih dan tidak alih milikan pesalah dan keluarganya.

JAWAPAN :

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) sentiasa mengambil perhatian akan kegiatan operasi sindiket ceti haram atau lazimnya dikenali sebagai 'Ah Long' yang mengakibatkan orang ramai menjadi mangsa sindiket kepada kegiatan haram ini.

NO SOALAN : 3

2. Walau bagaimanapun, Pemberi Pinjam Wang (PPW) yang tidak berlesen terletak di bawah tanggungjawab Polis Diraja Malaysia (PDRM). Berdasarkan keputusan Mesyuarat Pasukan Khas Mencegah Ceti Haram yang diadakan pada 28 Disember 2006, telah wujud persefahaman di antara pihak PDRM dan KPKT bahawa KPKT hanya memberi tumpuan terhadap penguatkuasaan PPW berlesen sahaja selaras dengan Seksyen 5, Akta Pemberi Pinjam Wang 1951 [Akta 400]. Manakala PDRM pula bertanggungjawab dalam membanteras kegiatan Ah Long di bawah Seksyen 5(2).
3. Sehubungan itu, bagi kes-kes yang membabitkan Ah Long, mangsa ataupun mana-mana pihak yang berkenaan adalah dinasihatkan untuk membuat laporan polis di mana-mana balai polis yang berdekatan dan pihak KPKT juga akan merujuk kes-kes yang melibatkan Ah Long ke PDRM.
4. Untuk makluman Yang Berhormat juga, KPKT bersama beberapa Kementerian lain termasuk Bank Negara Malaysia sedang dalam proses penggubalan Akta Kredit Pengguna (AKP) yang turut melibatkan akta sedia ada bagi melindungi kepentingan pengguna dan menggalakkan pasaran kredit yang sihat.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : DATIN MASTURA BINTI MOHD YAZID
[KUALA KANGSAR]
TARIKH : 23.10.2019 (RABU)
SOALAN : 4

minta **MENTERI PEMBANGUNAN LUAR BANDAR** menyatakan konsep sebenar U.n.i KLINIK, dan apakah keistimewaan dan kelainan klinik tersebut berbanding dengan Klinik 1Malaysia dari aspek perkhidmatan kesihatan awam kepada golongan B40.

JAWAPAN:

Tuan Yang di-Pertua,

1. Untuk makluman Yang Berhormat, nama sebenar adalah **U.n.i KLINIK (*You and I*)** dan bukannya **KLINIK U.n.i**. Konsep U.n.i KLINIK ini adalah untuk meningkatkan kapasiti dan kapabiliti dalam bidang perubatan termasuk farmasi. Majlis Amanah Rakyat (MARA) telah merangka strategi dalam usaha untuk mewujudkan usahawan dalam bidang profesional melalui **Program Pembangunan Usahawan Profesional (ProSPEC)** yang dimulakan dalam bidang perubatan dengan memperkenalkan jaringan klinik di bawah satu jenama iaitu U.n.i KLINIK bermula tahun 2019 yang telah didaftarkan.
2. Program pembangunan usahawan ProSPEC merangkumi keseluruhan ekosistem keusahawanan seperti seminar, latihan keusahawanan, konsultasi dan khidmat nasihat, pinjaman perniagaan, promosi dan pemantauan prestasi syarikat.

3. U.n.i KLINIK menawarkan perkhidmatan premium di bawah satu sistem yang cekap dengan harga mampu milik. Program ini memberi peluang kepada doktor yang telah tamat latihan *housemanship* dan mempunyai lesen perubatan serta pengalaman bekerja untuk mempunyai perniagaan/ klinik sendiri.
4. Kelainan antara U.n.i KLINIK dengan Klinik 1Malaysia (kini dikenali sebagai Klinik Komuniti) ialah U.n.i KLINIK dibangunkan untuk membantu golongan profesional dalam bidang perubatan untuk membuka klinik kesihatan swasta dengan kadar bayaran yang berpatutan.
5. U.n.i KLINIK mempunyai strategi untuk membantu golongan B40 melalui perkhidmatan kepada penduduk setempat melalui **Skim Peduli Kesihatan untuk Kumpulan B40 (PeKa B40)** sebagai salah satu teras pelaksanaan. PeKa B40 adalah satu inisiatif Kerajaan melalui Kementerian Kesihatan Malaysia (KKM) yang bertujuan untuk menampung keperluan kesihatan golongan berpendapatan rendah dengan memberi fokus terhadap penyakit tidak berjangkit (NCD).
6. Di samping itu, lokasi U.n.i KLINIK tersebut turut meliputi kawasan bandar dan luar bandar bagi membantu kumpulan B40 seperti golongan miskin bandar.
7. Sejak program ini diperkenalkan pada Januari 2019, sehingga kini, sebanyak 18 buah klinik telah diluluskan dan disalurkan pembiayaan berjumlah RM5.4 juta untuk memulakan perniagaan bagi kumpulan pertama. Manakala bagi kumpulan ke-2, seramai 20 peserta telah menghadiri Program Latihan Inkubator Khas U.n.i Klinik pada 21 hingga 29 September 2019.

Sekian, terima kasih.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : TUAN SANISVARA NETHAJI RAYER A/L
RAJAJI [JELUTONG]
TARIKH : 23 OKTOBER 2019 (RABU)

SOALAN NO. 5

TUAN SANISVARA NETHAJI RAYER A/L RAJAJI [JELUTONG] minta **MENTERI KESIHATAN** menyatakan apakah langkah-langkah yang akan diambil oleh Kementerian untuk mengurangkan kejadian bunuh diri yang makin meningkat di negara kita.

JAWAPAN

Yang di-Pertua,

Saya memohon untuk menjawab pertanyaan ini secara bersekali bersama-sama dengan satu (1) soalan yang lain yang menyentuh isu sama yang iaitu pertanyaan bertarikh 11 November 2019:

TUAN AHMAD MARZUK BIN SHAARY [PENGKALAN CHEPA] minta **MENTERI KESIHATAN** menyatakan:

- a) berapa jumlah dan statistik kematian akibat kes bunuh diri 5 tahun terkini mengikut agama dan keturunan; dan
- b) sudahkah Kerajaan merangka "Strategic Action Plan" untuk "Mental Health" yang di uar-uarkan sebelum ini untuk menangani masalah kesihatan mental di samping pendekatan-pendekatan lain untuk mengurangkan kejadian bunuh diri.

Yang di-Pertua,

Kementerian Kesihatan Malaysia (KKM) komited untuk melaksanakan tindakan dalam pencegahan masalah kesihatan mental dan mengurangkan kejadian bunuh diri. Kajian Kesihatan dan Morbiditi Kebangsaan pada tahun 2017 mendapati bahawa tingkahlaku bunuh diri dalam kalangan remaja berumur antara 13 dan 17 tahun menunjukkan peningkatan tren bagi prevalen idea bunuh diri iaitu 10% dalam tahun 2017 berbanding 7.9% dalam tahun 2012.

Berdasarkan statistik dan makluman daripada pihak Polis Di-rajaa Malaysia (PDRM) juga, dari tahun 2014 sehingga Jun 2019, sebanyak 356 kes bunuh diri telah dilaporkan di seluruh Malaysia. Dilaporkan bahawa jumlah kematian paling tinggi adalah melibatkan kaum Cina iaitu sebanyak 147 kes, kaum India sebanyak 76 kes, kaum Melayu sebanyak 47 kes, 17 kes bagi kaum – kaum lain dan 69 kes bagi bukan warganegara.

Bagi menghadapi masalah ini, KKM telah menyediakan perkhidmatan saringan dan rawatan bagi masalah kesihatan mental di 60 buah hospital-hospital Kerajaan, 1001 buah Klinik Kesihatan di peringkat kesihatan primer dan 25 buah Pusat Komuniti Kesihatan Mental (MENTARI). Individu yang mempunyai masalah berkaitan isu-isu kesihatan mental boleh juga mendapatkan bantuan melalui talian Hotline (bebas tol) 24 jam +603-79568145 yang dikendalikan oleh *The Befrienders*.

Aktiviti-aktiviti kesedaran kesihatan mental juga dilaksanakan melalui Kempen Cara Hidup Sihat yang memfokuskan kepada menangani stress. Program kesihatan mental di komuniti turut menawarkan perkhidmatan di klinik kesihatan yang meliputi aktiviti promosi dan pengesanan awal melalui saringan untuk mengesan awal tahap stres, keresahan dan kemurungan serta individu yang berisiko mengalami masalah kesihatan mental serta pelaksanaan intervensi.

Di samping itu, di peringkat kebangsaan, kempen '**Let's TALK Minda Sihat**' merupakan satu inisiatif baru yang akan dikendalikan setiap bulan Oktober dengan penglibatan beberapa agensi-agensi kerajaan dan NGO

bagi membina kesedaran rakyat mengenai kepentingan kesejahteraan kesihatan minda serta usaha bagi membanteras stigma terhadap kesihatan mental. **Untuk makluman, satu majlis pelancaran Kempen 'Let's TALK Minda Sihat sempena sambutan Hari Kesihatan Mental Sedunia telah diadakan pada 17 Oktober 2019 di Institut Latihan Dewan Bandaraya Kuala Lumpur dan dirasmikan oleh YB Menteri Kesihatan.** Sambutan pada tahun 2019 ini memberi fokus kepada golongan remaja dan dewasa. KKM juga sedang dalam peringkat akhir bagi membangunkan Pelan Tindakan Strategik Kesihatan Mental Kebangsaan. Pelan tindakan ini dijadualkan untuk dilancar dan dilaksanakan bermula tahun 2020. Fokus bagi pelan tindakan ini adalah 'perkongsian pintar' (*smart partnership*) antara agensi-agensi kerajaan, NGO dan badan profesional dalam meningkatkan kesedaran serta kepentingan dalam mendapatkan bantuan dan rawatan bagi masalah kesihatan mental dan juga meningkatkan kualiti perkhidmatan bagi kesihatan mental.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : TUAN YUSUF BIN ABD. WAHAB
[TANJONG MANIS]
TARIKH : 23 OKTOBER 2019
[RABU]

SOALAN NO. 6

Minta **MENTERI PERUMAHAN DAN KERAJAAN TEMPATAN** menyatakan untuk menambah aset dan anggota untuk Balai Bomba di Bandar Baru Tanjong Manis. Kejadian kebakaran hutan dan rumah panjang yang berlaku baru-baru ini di Parlimen Tanjong Manis mengalami masalah kekurangan aset dan anggota untuk memadam kebakaran hutan seperti di Kg. Sedik dan kawasan-kawasan lain dan aset, seperti bot yang dipasang alat pemadam api, ketika berlaku kebakaran rumah panjang di Stalun yang tiada hubungan jalan darat.

JAWAPAN :

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan (KPKT) mengambil perhatian mengenai pandangan Yang Berhormat untuk meningkatkan jumlah aset dan anggota bomba di Balai Bomba dan Penyelamat Tanjong Manis.
2. Pada masa ini perjawatan dan aset yang diperuntukkan di Balai Bomba dan Penyelamat Tanjong Manis adalah berasaskan kepada **indeks risiko harian** di kawasan tersebut. Frekuensi

kebakaran dan kecemasan yang berlaku baru-baru ini adalah disebabkan oleh **fenomena cuaca panas** yang berlaku **secara bermusim**. Kini Balai Bomba dan Penyelamat Tanjung Manis dianggotai 25 pegawai bomba dan mempunyai sebuah jentera bomba yang dilengkapi dengan peralatan pemadaman dan penyelamatan.

3. Sebarang kecemasan yang berlaku di kawasan tersebut termasuklah kebakaran hutan dan tanah gambut akan dikendalikan oleh *responder* dari Balai Bomba dan Penyelamat Tanjung Manis yang turut dibantu oleh balai-balai bomba yang terdekat di Sarikei dan Bintangor serta Pasukan Bomba Sukarela di sekitarnya. Bagi rumah panjang yang tidak dapat diakses melalui jalan darat dan berada jauh dari balai bomba, Pasukan-pasukan Bomba Sukarela yang terlatih telah disediakan oleh Jabatan Bomba dan Penyelamat Malaysia Negeri Sarawak mengikut zon masing-masing dan program ini akan diperluaskan ke rumah-rumah panjang yang lain.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : DATO' SRI DR. SANTHARA
[SEGAMAT]
TARIKH : 23.10.2019 (RABU)
SOALAN : 7

minta **MENTERI PEMBANGUNAN LUAR BANDAR** menyatakan statistik peruntukan geran yang diberikan kepada setiap **MPKK (kampung)** dan **bagaimana projek-projek kampung diberikan prioriti utama**, seperti memperbaiki jalan raya, pemasangan lampu jalan dan lain-lain kemudahan asas seperti air dan elektrik (seperti lampu jalan), khususnya di Parlimen Segamat.

JAWAPAN:

Tuan Yang di-Pertua,

1. Untuk makluman Yang Berhormat, sehingga September 2019, sebanyak 15 daripada 25 MPKK di Parlimen Segamat telah menerima peruntukan geran dengan kos sebanyak RM149,400.00. Permohonan boleh dibuat melalui Majlis Pengurusan Komuniti Kampung (MPKK) kepada Pejabat Daerah, sebelum permohonan tersebut dikemukakan kepada Pejabat KPLB Negeri. **Maklumat lengkap berkaitan senarai program dan jumlah Geran MPKK bagi setiap MPKK di Parlimen Segamat akan dikemukakan secara bertulis.**

NO. SOALAN: 7

2. Manakala, permohonan Projek Jalan Luar Bandar (JALB), Projek Bekalan Air Luar Bandar (BALB) dan Projek Bekalan Elektrik Luar Bandar (BELB), Yang Berhormat boleh mengemukakan permohonan kepada Unit Perancang Ekonomi Negeri (UPEN) untuk disenaraikan dalam senarai keutamaan pembangunan Kerajaan Negeri. Seterusnya, pihak UPEN akan memperakukan dan mengemukakan senarai berkenaan kepada Kementerian ini untuk diangkat kepada Kementerian Hal Ehwal Ekonomi (MEA) bagi kelulusan di bawah Rancangan Malaysia Kedua Belas (RMKe12).
3. Bagi JALB, dari tahun 2010 sehingga 2018, sebanyak empat (4) projek telah dilaksanakan di Parlimen Segamat dengan kos sebanyak RM146.9 juta.
4. Bagi BALB, Kementerian telah menerima permohonan daripada Kerajaan Negeri untuk pembinaan infrastruktur air yang turut melibatkan enam (6) kampung di daerah Segamat. Kementerian sedang dalam proses lantikan perunding yang kemudiannya akan menjalankan pengesahan skop dan reka bentuk.
5. Untuk makluman Yang Berhormat, dari tahun 2002 sehingga tahun 2018 melalui Program Pemasangan Lampu Jalan Kampung (LJK) Fasa 1 sehingga Fasa 9, sebanyak 4,493 unit LJK telah dipasang di Parlimen Segamat, melibatkan peruntukan sebanyak RM2.25 juta. Pemasangan dibuat secara berperingkat dengan had maksima pemasangan LJK bagi setiap kampung adalah sebanyak 40 unit sahaja, mengikut keperluan dan keluasan kampung.
6. Bagi Program LJK Semenanjung Malaysia tahun 2019/2020 (Fasa 10) dijangka akan dimulakan pelaksanaannya dalam bulan November 2019, dengan kuota sebanyak 200 unit LJK, dengan pecahan 160 unit LJK jenis *high pressure sodium vapour* (HPSV) dan 40 unit LJK jenis *light emitting diode* (LED), akan dipasang di kampung-kampung yang layak di dalam Parlimen Segamat, dengan nilai peruntukan sebanyak RM189,440.00.

NO. SOALAN: 7

7. Untuk makluman Yang Berhormat, permohonan bagi projek Jalan Perhubungan Desa (JPD) dan Program Ameniti Sosial (PAMS) akan dibuat siasatan terlebih dahulu bagi menentukan skop dan anggaran kos. Seterusnya, senarai tersebut akan disusun mengikut keutamaan sebelum diperakukan di peringkat Kementerian tertakluk kepada jumlah peruntukan yang diluluskan pada tahun semasa.
8. Bagi tahun 2019, sebanyak empat (4) projek JPD telah diluluskan di Parlimen Segamat melibatkan kos sebanyak RM355,000.00.

Sekian, terima kasih.

**MESYUARAT KETIGA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB DR. NIK MUHAMMAD ZAWAWI BIN HAJI
SALLEH
KAWASAN : PASIR PUTEH
TARIKH : 23 OKTOBER 2019 (RABU)

SOALAN :

YB DR. NIK MUHAMMAD ZAWAWI BIN HAJI SALLEH minta **MENTERI KERJA RAYA** menyatakan adakah pihak Kementerian akan mengutamakan kerja penyelenggaraan dan pembaikan jalan raya persekutuan di negeri Kelantan yang menjadi laluan perhubungan utama Pantai Barat dan Pantai Timur.

JAWAPAN :

Tuan Yang Di-Pertua,

Untuk makluman Ahli Yang Berhormat, laluan yang dimaksudkan oleh Ahli Yang Berhormat ialah **Lebuhraya Timur Barat (FT04)** iaitu laluan perhubungan utama Pantai Barat dan Pantai Timur yang menghubungkan Gerik, Perak sehingga ke Pasir Puteh, Kelantan yang melibatkan panjang jalan **115.95 km**.

Setiap tahun, Kementerian akan memperuntukkan sebanyak **RM2.38 juta** bagi pelaksanaan **penyenggaraan rutin**. Skop **penyenggaraan rutin** ini meliputi kerja-kerja seperti tampalan lubang jalan, meratakan bahu jalan, memotong rumput, mencuci perabot jalan, membersihkan sistem perparitan jalan dan pembetung serta melakukan rondaan pemeriksaan jalan.

Untuk makluman Ahli Yang Berhormat, bagi skop kerja tampalan lubang jalan, tindakan tampalan lubang jalan dilaksanakan dalam tempoh 24 jam oleh syarikat konsesi selepas lubang jalan dikenal pasti. Penampalan lubang jalan ini ialah sebagai langkah awal atau kaedah "*preventive*" bagi tujuan faktor keselamatan pengguna jalan sebelum kerja-kerja turapan kekal dilaksanakan di bawah skop **penyenggaraan berkala pavemen**.

Bagi **penyenggaraan berkala** pada tahun **2018**, sebanyak **RM5.72 juta** telah diperuntukkan iaitu daripada jumlah tersebut, sebanyak **RM4.85 juta** telah diperuntukkan bagi penyenggaraan **berkala pavemen** dan sebanyak **RM870 ribu** telah diperuntukkan bagi penyenggaraan **berkala bukan pavemen** di laluan tersebut.

Manakala bagi tahun **2019**, setakat **Ogos 2019**, Kementerian telah memperuntukkan sebanyak **RM2.98 juta** bagi **penyenggaraan berkala** iaitu sebanyak **RM2.6 juta** telah diperuntukkan bagi penyenggaraan **berkala pavemen** dan sebanyak **RM380 ribu** telah

diperuntukkan bagi penyenggaraan **berkala bukan pavemen** di laluan tersebut.

Kementerian sentiasa komited untuk melaksanakan kerja-kerja penyenggaraan Jalan Persekutuan khususnya di laluan **Lebuhraya Timur Barat (FT04)** terutamanya **penyenggaraan berkala**. Setiap tahun Kementerian akan menyediakan program penyenggaraan berkala **pavemen** dan berkala **bukan pavemen** bagi permohonan peruntukan kepada Kementerian Kewangan. Pelaksanaan **penyenggaraan berkala** ini adalah tertakluk kepada kelulusan peruntukan oleh Kementerian Kewangan.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN
DARIPADA : DATUK WIRA HAJAH MAS ERMIEYATI
BINTI SAMSUDIN [MASJID TANAH]
TARIKH : 23 OKTOBER 2019 (RABU)

SOALAN NO. 9

DATUK WIRA HAJAH MAS ERMIEYATI BINTI SAMSUDIN [MASJID TANAH] minta **MENTERI KESIHATAN** menyatakan langkah Kementerian untuk membendung penjualan atas talian rokok elektronik di kalangan remaja bawah umur.

JAWAPAN

Yang di-Pertua,

Rokok elektronik atau Vape merupakan sejenis produk merokok yang baru di masa kini. Masalah penggunaan rokok elektronik atau Vape di Malaysia telah bermula seawal tahun 2013 dan telah memuncak penggunaannya di Malaysia pada tahun 2016. Masalah ini bukan sahaja berlaku di Malaysia malahan ia juga merupakan satu epidemik global yang mengundang kebimbangan pelbagai pihak.

Pihak KKM telah mengambil langkah untuk membendung penjualan atas talian rokok elektronik bukan sahaja di kalangan remaja bawah umur malahan membendung masalah penggunaannya di kalangan rakyat Malaysia amnya. Pelbagai agensi serta pihak berkaitan termasuk Suruhanjaya Komunikasi dan Multimedia Malaysia (SKMM) telah digerakkan di bawah Jawatankuasa Kerja Pakar Bagi Memperkukuhkan Kawalan Rokok Elektronik yang dipengerusikan oleh

NO SOALAN : 9

Timbalan Menteri Kesihatan. Pihak SKMM boleh melakukan sekatan ke atas sesuatu laman web yang menjual cecair rokok elektronik yang mengandungi nikotin apabila terdapat permohonan oleh pegawai KKM yang diberi kuasa di bawah Akta Racun 1952. Selain itu juga, kerjasama telah dilakukan dengan pihak pentadbir media sosial bagi menyekat mana-mana laman media sosial yang mempromosikan jualan rokok elektronik.

Sekian, terima kasih.

PEMBERITAHUAN PERTANYAAN BAGI JAWAB LISAN
DEWAN RAKYAT, PARLIMEN MALAYSIA,
PARLIMEN KEEMPAT BELAS

PERTANYAAN : JAWAB LISAN
DARIPADA : TUAN ABDUL LATIFF BIN ABDUL
RAHMAN
[KUALA KRAI]
TARIKH : 23 OKTOBER 2019

SOALAN :

Tuan Abdul Latiff bin Abdul Rahman [Kuala Krai] minta **MENTERI LUAR NEGERI** menyatakan apakah langkah-langkah yang telah diambil bagi menjaga kebajikan keluarga mangsa tragedi tembakan di Masjid Christchurch, New Zealand.

JAWAPAN :

Tuan Yang di-Pertua,

Saya mengucapkan terima kasih kepada Yang Berhormat Kuala Krai atas pertanyaan yang dikemukakan.

Tuan Yang di-Pertua,

2. Kerajaan merakamkan penghargaan atas keprihatinan daripada pelbagai pihak berhubung tragedi tembakan yang berlaku di dua buah masjid di Christchurch, New Zealand pada 15 Mac 2019.

3. Kerajaan melalui Kementerian Luar Negeri dan Suruhanjaya Tinggi Malaysia di New Zealand telah menghulurkan bantuan sewajarnya kepada mangsa serta waris yang terlibat dalam insiden tersebut. Untuk makluman Dewan yang mulia ini, sejurus selepas

insiden tersebut, pihak Suruhanjaya Tinggi telah mengambil tindakan segera untuk menghubungi hospital, pihak penguatkuasa dan agensi tempatan dalam urusan seperti mengesan mangsa yang hilang, ujian DNA, proses pengecaman dan identifikasi mangsa serta upacara pengebumian.

4. Pegawai-pegawai kanan dari Kementerian Luar Negeri dan Suruhanjaya Tinggi juga melawat para mangsa dan waris yang terlibat bagi memberikan semangat dan sokongan moral kepada mereka serta memastikan hak dan kebajikan mereka sentiasa terpelihara.

5. Pihak Suruhanjaya Tinggi turut menyelaraskan lawatan kerja yang dilakukan oleh YB Datuk Seri Dr. Mujahid Yusof Rawa, Menteri di Jabatan Perdana Menteri yang datang melawat para mangsa dan waris mewakili Kerajaan Malaysia serta mengadakan perbincangan dengan Kerajaan New Zealand. Sumbangan daripada Ahli-ahli Parlimen, syarikat swasta, pertubuhan bukan kerajaan (NGO) dan individu-individu lain juga disampaikan oleh pihak Suruhanjaya Tinggi kepada pihak mangsa dan waris.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : PUAN JUNE LEOW HSIAD HUI
[HULU SELANGOR]
TARIKH : 23.10.2019 (RABU)
SOALAN : 11

minta **MENTERI PEMBANGUNAN LUAR BANDAR** menyatakan usaha-usaha Kementerian bagi mempromosikan produk yang dihasilkan oleh usahawan desa dan membantu golongan ini menembusi pasaran antarabangsa.

JAWAPAN:

Tuan Yang Di-Pertua,

1. Untuk makluman Yang Berhormat, Kementerian Pembangunan Luar Bandar (KPLB) telah melancarkan Pelan Harapan Pembangunan Luar Bandar 2018-2023 yang mempunyai enam (6) Teras pada 29 Oktober 2018. Di bawah **Teras 2 iaitu Ekonomi Luar Bandar Yang Berdaya Saing** melalui strategi keenam (ke-6) iaitu **Membangunkan Persekitaran Perniagaan yang Kondusif**, KPLB telah merancang satu (1) program yang dipanggil **Program Rural to Global** (RTG).
2. Di samping itu, Dasar Pembangunan Luar Bandar telah dilancarkan pada 27 Jun 2019 juga telah menggariskan strategi bagi memperkasa pemasaran produk dan perkhidmatan keluaran usahawan luar bandar bagi membina rangkaian pasaran domestik dan global di bawah Teras 2 iaitu Keusahawanan Pemacu Pembangunan Ekonomi.
3. Dalam hal ini, program *Rural to Global* bertujuan membantu untuk membuka akses kepada pasaran antarabangsa terutamanya

NO. SOALAN: 11

usahawan-usahawan luar bandar yang telah menghasilkan produk berkualiti, memenuhi piawaian untuk dieksport, dan berpotensi untuk pasaran yang hendak diterokai.

4. Melalui program ini, KPLB telah menyertai dua (2) program promosi eksport bertaraf antarabangsa iaitu *Malaysia International Halal Showcase* (MIHAS) 2019 pada 3-6 April 2019 dan Ekspo *Malaysia Fest* 2019 di Singapura pada 25-28 Julai 2019. Seramai 20 orang usahawan telah dibawa menyertai MIHAS 2019 dan telah menghasilkan pendapatan sebanyak RM1.709 Juta, manakala Ekspo *Malaysia Fest* 2019 pula telah disertai oleh 15 orang usahawan dengan jumlah pendapatan sebanyak RM3.3 Juta.
5. Selain itu, KPLB melalui Majlis Amanah Rakyat (MARA) turut membantu usahawan desa untuk menembusi pasaran antarabangsa melalui program **Gate to Global (GTG)**. GTG adalah program yang dilaksanakan dengan kerjasama strategik bersama MATRADE dan SME Corp. Sehingga kini, sebanyak 18 buah syarikat telah berjaya memasarkan produk ke pasaran global seperti China, Brunei, Singapura dan Emiriah Arab Bersatu.
6. Antara kemudahan yang disediakan oleh pihak MARA kepada usahawan yang menyertai program GTG adalah program latihan dan bimbingan, kemudahan bantuan kewangan dan penembusan pasaran Halal global. Sehingga Jun 2019, seramai 87 orang usahawan telah menerima manfaat melalui program tersebut.
7. KPLB juga mengambil inisiatif melaksanakan program Desamall@KPLB bagi memperluaskan pasaran produk usahawan luar bandar ke luar negara melalui pemasaran atas talian menggunakan platform Lazada, Shopee dan ebay. Melalui program ini, usahawan diberi latihan dan bimbingan seperti *product photoshoot*, urusan pesanan dan pembayaran atas talian. Sehingga kini, seramai 1,161 orang usahawan telah dilatih di bawah program Desamall@KPLB ini dan sejumlah 14,000 *stock keeping unit* (SKU) diniagakan di platform ini dengan nilai jualan RM1.25 juta.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN
DARIPADA : DATO' SERI HAJI IDRIS BIN JUSOH
[BESUT]
TARIKH : 23 OKTOBER 2019 (RABU)

SOALAN NO. 12

DATO' SERI HAJI IDRIS BIN JUSOH [BESUT] minta **MENTERI KESIHATAN** menyatakan status terkini berkaitan projek pembinaan *High Dependency Ward* di Hospital Besut.

JAWAPAN

Yang di-Pertua,

Kerajaan sentiasa berusaha untuk menambahbaik penyampaian perkhidmatan kesihatan di seluruh negara. Projek pembinaan *High Dependancy Ward* Hospital Besut secara tender terbuka telah diiklankan pada 27 Ogos 2019.

Tarikh tutup tender adalah pada 8 Oktober 2019 dan Surat Setuju Terima (SST) dijangka akan dikeluarkan kepada petender yang berjaya pada 20 Disember 2019.

Fasa pembinaan dijangka akan mengambil masa selama dua tahun bermula pada Januari 2020 dan siap pada Januari 2022.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGKAL KEDUA
PARLIMEN KEEMPAT BELAS**

PERTANYAAN : LISAN
DARIPADA : DATUK ZAKARIA BIN MOHD. EDRIS
@ TUBAU
[LIBARAN]
TARIKH : 23 OKTOBER 2019
[RABU]

SOALAN NO. 13

Minta **MENTERI PERUMAHAN DAN KERAJAAN TEMPATAN** menyatakan :-

- (a) apakah inisiatif yang akan diambil oleh Kerajaan dalam menjamin kesejahteraan penduduk selepas insiden lif terhempas di Projek Perumahan Rakyat (PPR) Kerinchi awal Ogos lalu; dan
- (b) adakah Kerajaan bercadang untuk menubuhkan sebuah perbadanan yang dikawal oleh Kerajaan Persekutuan dengan meletakkan penyelenggaraan PPR di bawahnya.

JAWAPAN :

Tuan Yang di-Pertua,

Jawapan (a)

1. Untuk makluman Yang Berhormat, Kerajaan melalui Kementerian Perumahan dan Kerajaan Tempatan (KPKT) sentiasa mengambil berat akan kesejahteraan penduduk sama ada yang menghuni di perumahan berstrata kos rendah swasta ataupun awam.
2. Antara inisiatif yang dilaksanakan oleh Kerajaan untuk menjamin kesejahteraan penduduk yang tinggal di perumahan berstrata kos rendah dan kos sederhana rendah awam dan swasta terutamanya yang berkaitan dengan keselamatan lif adalah dengan memperkenalkan program penyelenggaraan perumahan melalui Program Penyelenggaraan Perumahan (PPP) (bagi perumahan awam) dan Tabung Penyelenggaraan Perumahan Malaysia (TPPM) (bagi perumahan swasta).
3. Kedua-dua program ini merupakan inisiatif secara *one-off* dalam membantu penghuni-penghuni perumahan yang terlibat bagi membaik pulih dan menyenggara bangunan dan harta bersama. Antara skop kerja pembaikan yang terlibat adalah seperti mengganti bumbung, tangki air dan pendawaian elektrik termasuklah mengganti lif yang rosak.
4. Pada tahun 2020, peruntukan untuk program penyelenggaraan perumahan di bawah PPP dan TPPM adalah sebanyak RM100 juta sebagaimana yang diumumkan semasa pembentangan Bajet 2020. Peruntukan ini termasuklah untuk kerja-kerja penyelenggaraan lif di perumahan berstrata kos rendah awam dan swasta.

5. Untuk makluman Yang Berhormat jua, selain daripada inisiatif berbentuk fizikal, Kerajaan juga telah menggubal Dasar Komuniti Negara yang bertujuan untuk menangani isu perumahan di peringkat komuniti setempat, khususnya di kawasan perumahan berstrata kos rendah di seluruh negara.
6. Objektif utama Dasar Komuniti Negara adalah untuk mendaya upayakan (*empowering*) komuniti setempat supaya mereka boleh melibatkan diri secara aktif dalam pengurusan dan penyelenggaraan harta awam dan harta bersama yang merupakan sebahagian daripada tempat tinggal mereka. Ini adalah selaras dengan Kluster 1 Dasar Komuniti Negara iaitu Infrastruktur dan Penyelenggaraan di mana di bawah Strategi 1.2, Kerajaan ingin mempergiat penglibatan komuniti dalam pengurusan dan penyelenggaraan harta bersama.
7. Justeru, memandangkan program-program penyelenggaraan yang disediakan adalah secara *one-off*, Kementerian menyarankan agar penduduk bersama-sama pihak pengurusan sama ada pengurus harta yang dilantik oleh Pihak Berkuasa Negeri (PBN) / badan pengurusan bersama (JMB) / perbadanan pengurusan (MC) menjaga dan menyelenggara kawasan pemajuan masing-masing. Sebagai contoh, penduduk hendaklah membayar sewa atau caj penyelenggaraan kepada pihak pengurusan bagi memastikan kerja-kerja penyelenggaraan dapat dilaksanakan dengan baik.

Jawapan (b)

1. Untuk makluman Yang Berhormat, Kerajaan melalui KPKT juga telah bercadang untuk menubuhkan sebuah perbadanan yang dikawal oleh Kerajaan Persekutuan dengan meletakkan penyelenggaraan Program Perumahan Rakyat (PPR) di bawahnya. Perbadanan yang akan ditubuhkan kelak akan dikenali sebagai Perbadanan Pengurusan Perumahan Negara (3P). Penubuhan 3P sebagai satu agensi di bawah Kerajaan Persekutuan adalah bertujuan untuk melaksana, mengurus dan menyelenggara perumahan awam dan swasta kos rendah dan kos sederhana.
2. Fungsi 3P adalah melaksanakan urusan operasi PPR di seluruh negara meliputi aspek-aspek seperti berikut:
 - (i) pengisian dan pengurusan perumahan awam (sewaan/penjualan/sewa untuk dimiliki secara pajakan);
 - (ii) pengurusan kutipan sewa;
 - (iii) penyelenggaraan bangunan dan kemudahan bersama perumahan;
 - (iv) pemantauan dan penguatkuasaan yang merangkumi kutipan sewa/bayaran balik dan pematuhan kepada peraturan;
 - (v) menyelaraskan aktiviti yang berkaitan kesejahteraan komuniti di perumahan; dan
 - (vi) memberi cadangan untuk pembangunan semula perumahan.

3. Sehubungan itu, penubuhan 3P akan dilaksanakan setelah Akta 3P dibentangkan dan mendapat persetujuan di peringkat Jemaah Menteri dan Parlimen. Penubuhan 3P merupakan salah satu pelan tindakan di bawah Dasar Perumahan Negara (2018-2025) iaitu; Fokus 3 Memastikan Kejiranan yang berkualiti dan kohesif, Strategi 3.1 menyediakan dan mengekalkan kemudahan dan perkhidmatan yang berkualiti di kawasan kejiranan untuk menyokong kehidupan masyarakat.
4. Akhir sekali, peranan semua pihak amat diperlukan bagi memastikan setiap komuniti perumahan yang tinggal di perumahan strata dapat menikmati kehidupan yang selesa, selamat dan kondusif bagi mengelakkan insiden lif terhempas berulang.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : **LISAN**
DARIPADA : **TUAN AHMAD TARMIZI BIN SULAIMAN**
[SIK]
TARIKH SOALAN : **23 OKTOBER 2019**

SOALAN NO. 14

minta **MENTERI PEMBANGUNAN USAHAWAN** menyatakan langkah yang telah diambil untuk membangunkan potensi dan peluang usahawan di daerah Sik bagi meningkatkan taraf ekonomi penduduk Sik yang masih berada dalam senarai daerah termiskin di Semenanjung Malaysia.

JAWAPAN

Tuan Yang di-Pertua,

1. Golongan usahawan luar bandar terutama yang berpendapatan rendah merupakan antara tumpuan Kementerian Pembangunan Usahawan (MED) dalam aspirasi menjadikan Malaysia sebagai negara keusahawanan menjelang tahun 2030.
2. Selaras dengan **Dasar Keusahawanan Nasional 2030 (DKN 2030)**, **Teras Strategik 3 : Merangsang Pembangunan Keusahawanan Bersepadu dan Holistik**, antara strategi/inisiatif yang dirancang MED bagi golongan usahawan luar bandar adalah seperti berikut :

NO. SOALAN: 14

- i. Memperkasakan program capaian (*outreach*) kepada golongan terpinggir termasuk B40, kawasan pedalaman dan OKU.
 - ii. Memperkasa gerakan koperasi dalam kalangan B40 dan masyarakat luar bandar, termasuk menggalakkan penubuhan koperasi berasaskan komuniti.
3. Sehingga 31 Ogos 2019, Kementerian melalui TEKUN Nasional telah menyalurkan peruntukan sebanyak RM32.5 juta kepada 2,396 usahawan di daerah Sik merangkumi pelbagai skim pembiayaan di bawah TEKUN.
4. Selain TEKUN, program pembiayaan semasa di bawah agensi MED yang ditawarkan kepada usahawan luar bandar, adalah seperti berikut:
- (i) SME Bank
 - Skim Pembiayaan Ekonomi Desa (SPED); dan
 - Program Pembiayaan Perniagaan Kecil (SBF).
 - (ii) SME Corp. Malaysia
 - Program Tunas Usahawan Belia Bumiputera (TUBE); dan
 - Program Peningkatan Perusahaan Bumiputera (BEEP).
 - (iii) Bank Rakyat
 - Modal Usahawan Kecil (MusK); dan
 - Micro Enterprise Fund (MEF).

Tuan Yang di-Pertua,

5. Sehingga kini, terdapat 52 buah koperasi berdaftar di Daerah Sik dengan keanggotaan seramai 268,228 ahli dengan jumlah syer sebanyak RM6.9 juta dan aset sebanyak RM38.8 juta.
6. Rekod ini menunjukkan bahawa gerakan koperasi di Daerah Sik adalah kukuh dan memberangsangkan. Penubuhan ini boleh

NO. SOALAN: 14

disinergikan bersama-sama program pembangunan kapasiti koperator dalam melahirkan usahawan dan koperator yang berpengetahuan dan berkemahiran tinggi.

Tuan Yang di-Pertua,

7. Selain kemudahan pembiayaan dan gerakan koperasi, program pembangunan kapasiti juga merupakan inisiatif yang menyumbang kepada perkembangan potensi usahawan. Dalam perkara ini, Institut Koperasi Malaysia (IKM) Zon Utara yang beroperasi di Alor Setar, Kedah telah menawarkan 41 program pembangunan kapasiti kepada anggota koperasi dan usahawan di zon utara, termasuklah usahawan di Daerah Sik. Pelbagai bidang kursus telah ditawarkan termasuk teknologi maklumat, pengurusan perniagaan, komunikasi, kewangan dan lain-lain.
8. Selain itu, Institut Keusahawanan Negara (INSKEN) turut menawarkan pelbagai kursus/latihan keusahawanan jangka masa pendek dengan bayaran yuran yang minima. Kursus/latihan ini termasuk *coaching* serta *mentoring* secara *one to one* bersama BizKaunselor yang dilantik.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)

PERTANYAAN : LISAN

DARIPADA : YB PUAN VIVIAN WONG SHIR YEE
[SANDAKAN]

TARIKH : 23 OKTOBER 2019

SOALAN :

Minta **MENTERI PELANCONGAN, SENI DAN BUDAYA** menyatakan apakah fokus dan strategi daripada Kementerian dalam mempromosikan Sabah, khususnya Sandakan sempena Tahun Melawat Malaysia 2020.

JAWAPAN :

Tuan Yang di-Pertua,

Kementerian Pelancongan, Seni dan Budaya sentiasa mempromosi negeri-negeri di Malaysia termasuk Sabah bersempena dengan kempen Tahun Melawat Malaysia 2020. Fokus promosi bagi negeri Sabah adalah kepada produk pelancongan dan acara kepada pelancong dalam dan luar negeri melalui kerjasama dengan pejabat Wilayah di dalam negara dan pejabat luar negara.

NO. SOALAN: 15

Bagi Sandakan, fokus bagi produk pelancongan adalah memperkenalkan tarikan alam semulajadi, flora & fauna, hutan tropika dan kawasan sekitar pantai timur Sabah. Contoh tarikan alam semulajadi adalah seperti menyusuri Sungai Kinabatangan, melawat tempat bersejarah di Sandakan dan juga pusat pemuliharaan Orang Utan Sepilok, pusat Konservasi Beruang Matahari Borneo dan Pusat Penemuan Hutan Hujan.

Selain itu, fokus juga diberikan kepada acara-acara kebudayaan khusus di Sandakan seperti *Sandakan Food Festival* dan Jejak Warisan Sandakan.

Strategi yang digunakan adalah:

- 1) promosi melalui penggiat sosial media;
- 2) mempelbagaikan pakej-pakej pelancongan melalui kerjasama dengan syarikat penerbangan dan agensi-agensi pelancongan domestik dan antarabangsa;
- 3) mempromosi acara-acara festival yang akan diadakan di Sandakan & Sabah melalui lawatan suai kenal media; kolateral dan cenderamata;
- 4) mempromosikan produk-produk pelancongan Negeri Sabah dalam pameran-pameran antarabangsa seperti ITB Berlin, *World Travel Mart (WTM)* London, *Arabian Travel Market (ATM)* Dubai dan pameran-pameran lain.
- 5) Mengemaskini pengkalan data maklumat-maklumat produk pelancongan dan acara-acara pelancongan Sabah (dan Sandakan) dalam laman web rasmi Tourism Malaysia dan media sosial.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : DATO' HASBULLAH BIN OSMAN
[GERIK]
TARIKH : 23.10.2019 (RABU)
SOALAN : 16

minta **MENTERI PEMBANGUNAN LUAR BANDAR** menyatakan apakah perancangan baru dalam memperkasakan ekonomi masyarakat luar bandar serta mempertingkatkan lagi peluang pekerjaan di kalangan anak-anak muda dan berapakah statistik terkini kadar migrasi golongan muda dari luar bandar ke bandar kerana peluang pekerjaan.

JAWAPAN:

Tuan Yang di-Pertua,

1. Berdasarkan Laporan Survei Migrasi Malaysia, 2018 oleh Jabatan Perangkaan Malaysia, kadar migrasi dari luar bandar ke bandar bagi tahun 2018 adalah 4.8% berbanding 15.2% pada tahun 2016. Pada masa yang sama, kadar migrasi dari bandar ke luar bandar adalah 19.5% (2018) berbanding 4.2% (2016). Lebih daripada satu pertiga daripada migrasi dalaman adalah dari kumpulan umur 25 hingga 34 tahun (34.3%) dan kumpulan umur 15 hingga 24 tahun (26.2%). Mengikut keluarga merupakan sebab utama migrasi iaitu 44.2%, diikuti dengan kerjaya (24.3%) dan persekitaran (22.4%).
2. KPLB sentiasa memberi perhatian terhadap pemerksaan ekonomi masyarakat luar bandar melalui peningkatan peluang pekerjaan kepada penduduk seterusnya memastikan jurang pendapatan antara luar bandar dan bandar dapat dikurangkan. Antara program baharu yang dilaksanakan adalah:

- (a) **Projek Bersepadu Pembangunan Ekonomi Kampung (PROSPEK)** iaitu program pembangunan ekonomi kampung secara *in-situ* dengan membangunkan tanah sedia ada dan tanah terbiar untuk aktiviti ekonomi seperti pertanian, penternakan dan perladangan berdasarkan *niche/ signature product* di perkampungan berkenaan.
 - (b) **Program Desa Harapan** yang merupakan jalinan kerjasama antara KPLB dengan pihak swasta/ badan korporat dengan matlamat untuk menjana pendapatan dan mewujudkan peluang pekerjaan kepada masyarakat luar bandar khususnya belia melalui sokongan dan bantuan dalam aspek sosioekonomi, pendidikan dan kualiti hidup penduduk luar bandar.
 - (c) **TVET@KPLB** menawarkan peluang latihan teknikal dan vokasional (TVET) kepada golongan belia menerusi 274 buah Institusi Pendidikan TVET@KPLB yang dikawal selia oleh MARA, KEMAS, KEDA dan PERDA. Program ini bertujuan untuk meningkatkan kemahiran kumpulan sasar supaya mereka mampu mendapat pekerjaan atau mengusahakan perniagaan sendiri serta boleh menjana pendapatan yang lebih tinggi.
 - (d) **Pelbagai Program Keusahawanan** yang dilaksanakan oleh KPLB dan agensi di bawah KPLB. Antaranya program HIT Barber, MARA in Fashion (MIF), Gate to Global (GTG) dan Beauty in Business (Biss).
3. Kementerian juga sedang memberi penumpuan dalam membangunkan 28 daerah dengan pendapatan purata bulanan isi rumah di bawah RM 4 ribu berdasarkan Laporan Penyiasatan Pendapatan Isi Rumah dan Kemudahan Asas Mengikut Negeri dan Daerah Pentadbiran 2016 yang dikeluarkan oleh Jabatan Perangkaan Malaysia. Usaha ini akan melibatkan pelaksanaan program/ projek KPLB yang berbentuk pembangunan fizikal, ekonomi dan modal insan yang boleh meningkatkan kesejahteraan penduduk di daerah berkenaan dan seterusnya mengeluarkan daerah tersebut daripada kemiskinan.

4. Disamping itu, KPLB telah melancarkan Dasar Pembangunan Luar Bandar yang akan menjadi hala tuju baharu bagi pembangunan ekonomi dan keusahawanan yang menyeluruh di luar bandar. Pada masa sama, Kementerian sedang meneliti program-program baharu yang lain untuk dilaksanakan dalam Rancangan Malaysia Ke-12, khususnya untuk meningkatkan pendapatan golongan belia di luar bandar.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : TUAN LIM KIT SIANG
[ISKANDAR PUTERI]**

**TARIKH : 23 OKTOBER 2019
[RABU]**

SOALAN NO. 17

Minta **MENTERI PERUMAHAN DAN KERAJAAN TEMPATAN** menyatakan sama ada Kementerian berhasrat untuk meletakkan kuota rumah mampu milik untuk setiap pembangunan perumahan yang baharu bagi memastikan lebih banyak rumah mampu milik dibina.

JAWAPAN :

Tuan Yang di-Pertua,

1. Untuk makluman Yang Berhormat, Kementerian Perumahan dan Kerajaan Tempatan telah melancarkan Dasar Perumahan Mampu Milik Negara (DRMM) pada 11 Mei 2019. Salah satu daripada komponen DRMM adalah mengenai kawalan pembangunan rumah mampu milik. Perkara ini digariskan sebagai panduan kepada Kerajaan Negeri atau Pihak Berkuasa Tempatan dalam mengawal selia dan memantau penyediaan rumah mampu milik melalui kelulusan Kebenaran Merancang pembangunan perumahan dan hartanah. Manakala harga jualan bagi pasaran bebas adalah berdasarkan harga permintaan dan penawaran.
2. Berdasarkan polisi kawalan pembangunan rumah mampu milik, Kerajaan Negeri dan Pihak Berkuasa Tempatan boleh menentukan harga jualan rumah mampu milik berdasarkan pendapatan penengah atau kemampuan penduduk setempat.
3. Kelulusan Kebenaran Merancang dan polisi penetapan kuota pembangunan rumah mampu milik ini adalah di bawah bidang kuasa Kerajaan Negeri. Maka sebarang pindaan, rayuan pengurangan peratusan penyediaan, penukaran dan perpindahan serta pindaan harga rumah mampu milik adalah tertakluk kepada pertimbangan Majlis Mesyuarat Kerajaan Negeri.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN
DARIPADA : TUAN LUKANISMAN BIN AWANG SAUNI
[SIBUTI]
TARIKH : 23 OKTOBER 2019 (RABU)

SOALAN NO. 18

TUAN LUKANISMAN BIN AWANG SAUNI [SIBUTI] minta **MENTERI KESIHATAN** menyatakan adakah Kementerian mempunyai formula dan peruntukan khusus bagi menangani masalah obesiti di kalangan kanak-kanak.

JAWAPAN

Yang di-Pertua,

Obesiti berlaku apabila terdapat ketidakseimbangan tenaga yang diambil melalui makanan dan tenaga yang dikeluarkan melalui aktiviti fizikal. Sekiranya tenaga yang diambil adalah seimbang, masalah obesiti tidak akan berlaku. Kementerian Kesihatan Malaysia (KKM) mengambil berat akan perkara ini dan sedang melaksanakan pelbagai program bagi menangani masalah obesiti.

Pada masa kini, bagi mengatasi masalah obesiti di kalangan kanak-kanak, KKM memberi tumpuan untuk menjalankan aktiviti di sekolah memandangkan kebanyakan masa kanak-kanak dihabiskan di sekolah. Antara aktiviti yang sedang dijalankan adalah;

- a) Memasukkan komponen pemakanan di dalam kurikulum sekolah dan pra-sekolah seperti amalan pemakanan sihat dan selamat;

- b) Melaksanakan Program Hidangan Sihat di Sekolah (HiTS) secara sukarela;
- c) Memantau menu di kantin sekolah melalui Garis Panduan Kantin Sekolah;
- d) Membentuk menu sihat dan seimbang di taska, pra sekolah dan sekolah; dan
- e) Inisiatif Pemeraksanaan Persatuan Ibu Bapa dan Guru Bagi Menangani Masalah Obesiti di Sekolah (C-HAT).

Dalam masa yang sama, aktiviti turut dijalankan di peringkat komuniti dalam kalangan kanak-kanak. Antaranya adalah advokasi melalui bahan-bahan pendidikan seperti video pendek amalan pemakanan sihat contohnya video berkenaan konsep Suku-suku Separuh, sarapan sihat dan menggalakkan kanak-kanak mengambil air kosong, buah-buahan dan sayur-sayuran. Selain itu, mesej berkaitan pemakanan sihat turut disebarkan melalui media massa dan media sosial rasmi Bahagian Pemakanan dan Jabatan Kesihatan Negeri seperti laman *facebook*, *instagram* dan *twitter*. Bagi mengawal pengiklanan makanan-makanan yang tidak sihat di televisyen dan radio, Kementerian Kesihatan Malaysia sedang merangka mekanisma pengawalan iklan bersama Kementerian Komunikasi dan Multimedia Malaysia (KKMM) dan Suruhanjaya Komunikasi dan Multimedia Malaysia (SKMM).

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : TUAN YAMANI HAFEZ BIN MUSA
[SIPITANG]
TARIKH : 23.10.2019 (RABU)
SOALAN : 19

minta **MENTERI PEMBANGUNAN LUAR BANDAR** menyatakan jumlah projek pembangunan luar bandar yang sudah diluluskan untuk Sabah dan Sarawak sepanjang menerajui Kementerian sehingga bulan September 2019, dan pecahan mengikut kategori projek-projek kecil luar bandar.

JAWAPAN:

Tuan Yang di-Pertua,

1. Untuk makluman Yang Berhormat, sepanjang menerajui Kementerian ini bermula dari bulan Mei 2018 sehinggalah 30 September 2019 sejumlah RM3.50 billion peruntukan pembangunan telah diluluskan bagi kedua-dua negeri Sabah dan Sarawak.
2. Bagi negeri Sabah, pada tahun 2018 sahaja sejumlah RM970.39 juta telah diperuntukkan bagi melaksanakan 90 program/projek bagi manfaat masyarakat luar bandar Sabah. Manakala, bagi tahun 2019 pula, sejumlah 127 program/projek telah diluluskan melibatkan 29 program/projek baru dan 98 program/projek sambungan dengan peruntukan berjumlah RM1.09 billion.
3. Untuk negeri Sarawak pula, sejumlah 84 program/projek telah diluluskan pada tahun 2018 melibatkan peruntukan berjumlah RM756.18 juta. Pada tahun ini pula, terdapat 109 program/projek

NO. SOALAN: 19

telah diluluskan melibatkan 25 program/projek baru dan 84 projek sambungan dengan peruntukan berjumlah RM690.89 juta.

4. Sebagai makluman Yang Berhormat juga, bagi projek-projek kecil di bawah Kementerian ini yang melibatkan Program Jalan Perhubungan Desa (JPD), Program Ameniti Sosial (PAMS) dan Program Perumahan Rakyat Termiskin (PPRT) sejumlah RM383.60 juta telah diperuntukkan bagi kedua-dua negeri Sabah dan Sarawak dari tahun 2018 sehingga 30 September 2019.
5. Jumlah peruntukan yang diluluskan untuk Program Jalan Perhubungan Desa (JPD), Program Ameniti Sosial (PAMS) dan Program Perumahan Rakyat Termiskin (PPRT) pada tahun 2018 bagi negeri Sabah adalah sebanyak RM129.71 juta dan sebanyak RM92.00 juta bagi tahun 2019. Bagi Negeri Sarawak, jumlah peruntukan yang diluluskan bagi ketiga-tiga program/projek tersebut adalah sebanyak RM77.90 juta bagi tahun 2019 dan RM84.00 juta bagi tahun 2019.
6. Sukacita ingin saya maklumkan kepada Yang Berhormat bahawa jumlah peratusan peruntukan Pembangunan yang diluluskan bagi kedua-dua negeri Sabah dan Sarawak bagi tahun 2018 dan 2019 adalah melebihi separuh daripada peruntukan Kementerian ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN WAN HASSAN BIN MOHD RAMLI
[DUNGUN]
TARIKH : 23 OKTOBER 2019 (RABU)

SOALAN NO. 20

Y.B. TUAN WAN HASSAN BIN MOHD RAMLI [DUNGUN] minta **MENTERI KEWANGAN** menyatakan statistik hutang negara terkini (Mei 2018 - September 2019) dan apakah peranan Tabung Harapan dalam membantu menyelesaikan masalah hutang negara.

JAWAPAN

Tuan Yang di-Pertua,

Sehingga akhir-Jun 2019, hutang langsung Kerajaan Persekutuan meningkat RM73.9 bilion kepada **RM799.1 bilion** atau **52.7%** daripada KDNK.

Selain hutang langsung, Kerajaan juga mempunyai **komitmen jaminan yang perlu ditanggung dan dibiayai Kerajaan** yang terdiri daripada tanggungan hutang sebahagian syarikat berkaitan Kerajaan yang menerima Jaminan Kerajaan bagi melaksanakan projek infrastruktur pengangkutan awam dan utiliti. Di samping itu, Kerajaan juga menanggung **hutang syarikat 1MDB** serta liabiliti lain seperti **bayaran pajakan kewangan** (*finance lease*) bagi tempoh 2018 – 2047 ke atas projek yang dilaksanakan secara *Public-Private Partnership* (PPP) di bawah Unit Kerjasama Awam Swasta (UKAS), projek yang dilaksanakan secara *off-budget* melalui inisiatif pembiayaan swasta (PFI) dan Pembinaan BLT Sdn Bhd di bawah Kementerian Kewangan. Bayaran *finance lease* ini adalah berdasarkan perjanjian konsesi yang ditandatangani melibatkan obligasi tunai Kerajaan sehingga tahun 2047. Secara keseluruhannya, **jumlah keseluruhan komitmen hutang, jaminan dan liabiliti Kerajaan** dianggarkan berjumlah **RM1.1 trilion**.

Tuan Yang di-Pertua,

Tabung Harapan Malaysia (THM) ditubuhkan hasil daripada kesedaran dan keprihatinan rakyat Malaysia terhadap kedudukan hutang dan liabiliti negara yang tinggi serta semangat patriotik rakyat yang sayangkan negara untuk menghulurkan derma dan sumbangan ikhlas mengikut kemampuan mereka kepada Kerajaan bagi membantu menyelesaikan hutang terutamanya hutang 1MDB. Kerajaan telah menghentikan semua terimaan sumbangan dan derma oleh orang awam ke dalam akaun amanah ini pada 14 Januari 2019 sebagaimana yang dipersetujui dalam Mesyuarat Jemaah Menteri bertarikh 2 Januari 2019.

YB Menteri Kewangan telah mengeluarkan kenyataan media pada 16 Mei 2019 memaklumkan mengenai status penggunaan dana Tabung Harapan Malaysia (THM) ini iaitu bagi membayar hutang 1MDB sebagaimana yang telah diputuskan jawatankuasa yang mentadbir akaun amanah, iaitu Jawatankuasa Akaun Amanah THM.

Mesyuarat Jawatankuasa Akaun Amanah THM Bil.1/2019 pada 24 April 2019 telah memutuskan bahawa kesemua dana THM yang berjumlah RM203,292,117.41 digunakan bagi melunaskan sebahagian faedah hutang 1MDB yang berjumlah RM1.7 bilion bagi tahun 2019 serta bayaran balik yang perlu dilakukan di bawah akaun amanah ini. Sehingga akhir-September 2019, sebanyak RM143.8 juta telah dibelanjakan dengan perincian seperti berikut:

Bil.	Penggunaan Dana THM	Tarikh Transaksi	Jumlah (RM)	Jumlah Dana THM Yang Digunakan (RM)	Status
i.	Melunaskan sebahagian faedah hutang 1MDB - Faedah Bon 1MDB IMTN	30 Mei 2019	143,750,000.00	143,750,000.00	Selesai
ii.	Cek tak laku*	16 Jun 2019	51,500.00	51,500.00	Selesai
iii.	Bayaran balik sumbangan terkhilaf	25 Jun 2019	9,457.49	9,457.49	Selesai
Jumlah dana THM yang telah digunakan (sehingga 1 Oktober 2019)				RM143,810,957.49	

* Transaksi ini dilaksanakan bagi tujuan rekod perakaunan setelah mendapati 10 cek yang diterima merupakan cek tidak laku.

Baki dana dalam THM setakat akhir bulan September 2019 adalah sebanyak RM61,501,634.41. Jumlah ini akan digunakan untuk melunaskan sebahagian pembayaran faedah sukuk 1MDB pada akhir bulan November 2019.

**PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)**

PERTANYAAN : LISAN
DARIPADA : YB TUAN FONG KUI LUN
[BUKIT BINTANG]
TARIKH : 23 OKTOBER 2019

SOALAN :

Minta **MENTERI PELANCONGAN, SENI DAN BUDAYA** menyatakan berikutan pelancongan domestik boleh memainkan peranan untuk memacu ekonomi tempatan dengan perbelanjaan melebihi RM 92.5 bilion pada tahun 2018, apakah perancangan Kementerian untuk menambah bilangan pelancong domestik sempena Tahun Melawat Malaysia 2020.

JAWAPAN :

Tuan Yang di-Pertua,

Menurut Survei Pelancongan Domestik oleh Jabatan Perangkaan Malaysia, bilangan pelancong domestik telah menunjukkan pertumbuhan positif sebanyak 10.9% pada tahun 2018 dengan merekodkan seramai 78.2 juta pelancong domestik berbanding dengan 70.5 juta pelancong domestik pada tahun 2017. Di antara negeri yang mencatatkan penerimaan pelancong domestik tertinggi ialah Pahang, diikuti Johor, Perak, Selangor dan Negeri Sembilan. Oleh yang demikian, pelbagai acara dan program promosi domestik telah dirancang dan dilaksanakan sebagai persiapan ke arah Tahun Melawat Malaysia 2020 untuk mencapai sasaran pelancong domestik seramai 85.2 juta untuk tahun 2019 dan 92.8 sasaran untuk tahun 2020.

Kementerian melalui Tourism Malaysia terus mempergiatkan lagi usaha untuk meraih kedatangan pelancong domestik menjelang tahun 2020 melalui penyertaan di pameran pelancongan domestik seperti MATTA Travel Fair pada 15 hingga 16 Mac 2019 dan 6 hingga 8 September 2019 di Pusat Dagangan Dunia Putra (PWTC) serta Malaysia International Travel Mart (MITM) Travel Fair pada 9 hingga 11 Ogos 2019 di Mid Valley *Exhibiton Centre*. Turut tidak ketinggalan adalah penglibatan melalui pembukaan gerai pameran dalam acara-acara di peringkat domestik mahupun antarabangsa yang mampu untuk menarik tumpuan dan minat orang ramai untuk melancong seperti di Langkawi International Maritime & Aerospace (LIMA) yang telah berlangsung dari 26 hingga 30 Mac 2019, Hari Kraftangan Kebangsaan 2019 di Kompleks Kraf Kuala Lumpur pada 28 Februari hingga 11 Mac 2019, Floria Diraja 2019 di Putrajaya yang telah berlangsung dari 30 Ogos hingga 8 September 2019 dan Marvel Run di Putrajaya pada 7 September 2019.

Selain itu, dua (2) sesi Tourism Malaysia Travel Mart 2019 juga telah diadakan pada 14 Mac 2019 di Hotel Seri Pacific Kuala Lumpur dan 5 September 2019 di PWTC bagi menyediakan platform kepada penggiat-penggiat industri pelancongan untuk menjalinkan *networking* dan mempromosikan jualan pakej pelancongan. Program *Corporate Travel Bazaar* yang berkonsepkan *business to business* (B2B) antara pengusaha pelancongan (*sellers*) dengan syarikat korporat, Agensi Kerajaan dan pihak swasta (*buyers*) juga telah dianjurkan oleh Tourism Malaysia pada 10 Oktober 2019 di Hotel Pullman Bangsar. Program ini khusus untuk jualan pakej-pakej insentif kepada pihak berkepentingan dan secara tidak langsung dapat membantu meningkatkan pembangunan industri *Meetings, Incentives, Conventions and Exhibitions* (MICE) dalam negara.

Beberapa sesi libat urus dan seminar bersama persatuan-persatuan berkaitan pelancongan seperti *Malaysian Tourism Council* (MTC), *Malaysian Association of Tour and Travel Agents* (MATTA), *Malaysian Association of Hotels* (MAH) dan *Malaysian Tourist Guide Council* (MTGC) serta penggiat-penggiat industri pelancongan turut

diadakan di peringkat negeri sebagai salah satu inisiatif perkongsian maklumat terkini berkaitan pelancongan dan usaha promosi yang dijalankan sempena Tahun Melawat Malaysia 2020 ini.

Penyebaran maklumat mengenai produk pelancongan di setiap negeri kepada pelancong-pelancong juga akan dilaksanakan secara terus menerus melalui Pejabat - Pejabat Tourism Malaysia Wilayah dan 21 buah Pusat Penerangan Pelancongan (*Tourist Information Center*) di seluruh Malaysia serta melalui laman media sosial seperti *Instagram*, *Facebook* dan *Twitter* milik Tourism Malaysia. E-risalah Kalendar Acara-Acara Pelancongan sempena Tahun Melawat Malaysia 2020 juga telah dimuat naik di laman sesawang Tourism Malaysia dan boleh diakses oleh orang ramai bagi mendapatkan informasi berkenaan acara-acara pelancongan utama yang akan diadakan di setiap negeri sepanjang tahun 2020.

Kementerian ini juga merancang untuk mengadakan Majlis Pelancaran Perdana Tahun Melawat Malaysia 2020 pada penghujung tahun 2019 dengan cadangan pelancaran serentak atau *soft launch* akan turut diadakan di semua negeri dengan kerjasama Kerajaan-Kerajaan Negeri bagi meningkatkan lagi publisiti terhadap kempen Tahun Melawat Malaysia ini. Ini disusuli dengan majlis sambutan secara besar-besaran di pintu-pintu masuk utama negara bagi menyambut pelancong yang akan tiba pada 1 Januari 2020.

Melalui penganjuran kempen Tahun Melawat Malaysia 2020, Kementerian yakin ianya akan memberi manfaat besar kepada pelbagai lapisan masyarakat dengan peningkatan ekonomi melalui jumlah pendapatan di peringkat domestik serta pertambahan pendapatan tukaran asing kepada negara. Kempen ini juga berupaya untuk mewujudkan kesan limpahan kepada sektor-sektor ekonomi lain yang berkaitan termasuk meningkatkan pendapatan rakyat dan mewujudkan peluang pekerjaan terutamanya di kawasan luar bandar.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)

PERTANYAAN : LISAN

DARIPADA : YB DATUK ZAHIDI BIN ZAINUL ABIDIN
[PADANG BESAR]

TARIKH : 23 OKTOBER 2019

SOALAN :

Minta **MENTERI PELANCONGAN, SENI DAN BUDAYA** menyatakan berapa jumlah permohonan yang telah berjaya bagi Program Malaysia Rumah Keduaku (MM2H) dan nyatakan jumlah pemohon MM2H mengikut warganegara.

JAWAPAN :

Tuan Yang di-Pertua,

Program Malaysia Rumah Keduaku (MM2H) merupakan satu inisiatif Kerajaan Malaysia sejak tahun 2002 untuk menarik dan menawarkan peluang kepada warganegara asing yang mempunyai kemampuan kewangan yang tinggi serta memenuhi syarat untuk menetap dan merancakkan ekonomi di Malaysia melalui subsektor pelaburan, hartanah, pendidikan, perubatan, dan automobil. Warga asing yang berjaya menyertai Program MM2H akan diberikan Pas Lawatan Sosial dengan Visa Masuk Berulang Kali untuk tempoh 10 tahun dan boleh diperbaharui.

Sejak Program MM2H dilancarkan pada tahun 2002 sehingga November 2018, sejumlah 43,466 permohonan warganegara asing dari

NO. SOALAN: 22

131 buah negara telah diluluskan. Perincian peserta MM2H bagi 10 negara teratas dan lain-lain warganegara adalah seperti berikut:

BIL.	WARGANEGARA	JUMLAH KELULUSAN
1.	China	13,892
2.	Jepun	4,882
3.	Bangladesh	4,187
4.	United Kingdom	2,729
5.	Republik Korea	2,568
6.	Singapura	1,492
7.	Taiwan	1,428
8.	Iran	1,411
9.	Hong Kong	1,087
10.	India	1,077
11.	Lain-lain	9,190
JUMLAH KESELURUHAN		43,943

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS

PERTANYAAN : LISAN
DARIPADA : DATO' SRI MUSTAPA BIN MOHAMED [JELI]
TARIKH : 23 OKTOBER 2019 (RABU)

SOALAN NO. 23

DATO' SRI MUSTAPA BIN MOHAMED [JELI] minta **MENTERI KESIHATAN** menyatakan sejauh manakah persediaan Kementerian menguatkuasakan larangan merokok di tempat awam sepenuhnya bermula 1 Januari 2020. Apakah kadar pematuhan sejak larangan ini mula dikuatkuasa tahun ini dan apakah langkah yang diambil oleh Kementerian dalam hal ini.

JAWAPAN

Yang di-Pertua,

Pewartaan kedai makan antara langkah utama bagi melindungi orang awam daripada bahaya asap rokok selari dengan Artikel 8 WHO *Framework Convention on Tobacco Control* (WHO FCTC). Pewartaan ini telah dikuatkuasakan bermula 1 Januari 2019 dan telah dimulakan dengan Penguatkuasaan Pendidikan sehingga 1 Januari 2020. Pihak KKM mempunyai kekuatan sebanyak 4743 orang Pegawai penguatkuasa untuk menguatkuasakan larangan ini bermula 1 Januari 2020 nanti. Selain daripada itu pihak KKM telah pun menjalankan promosi serta kesedaran kepada masyarakat tentang penguatkuasaan sendiri atau “*self empowerment*” oleh Tuan Punya Permis serta masyarakat sekeliling.

Sepanjang penguatkuasaan pendidikan dijalankan, sebanyak 136,669 premis telah diperiksa dan 30,858 notis amaran telah dikeluarkan. Dari jumlah tersebut, sebanyak 27,231 buah premis yang telah diberikan amaran kerana gagal meletakkan tanda larangan merokok serta 3,627 notis dikeluarkan bagi orang yang didapati merokok di kawasan kedai makan. Sejumlah 22,205 aduan telah diterima semenjak Januari 2019 sehingga 1 September 2019.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATUK TAKIYUDDIN HASSAN
[KOTA BHARU]
TARIKH : 23 OKTOBER 2019 (RABU)

SOALAN NO. 24

Y.B. DATUK TAKIYUDDIN HASSAN [KOTA BHARU] minta **MENTERI KEWANGAN** menyatakan penjelasan terhadap sepucuk surat bertarikh 26 Julai 2019 yang telah menyatakan bahawa Kerajaan telah menganugerahkan projek secara rundingan terus kepada sebuah syarikat untuk pembinaan Bangunan Gunasama Persekutuan Kota Bharu di Tunjong, Kelantan bernilai RM450 juta.

JAWAPAN

Tuan Yang di-Pertua,

Projek pembinaan Bangunan Gunasama Persekutuan Kota Bharu, Tunjong, Kelantan telah dirancang untuk dilaksanakan sejak tahun 2016 lagi dan perlu dilaksanakan segera kerana bangunan sedia ada terlalu usang dan memerlukan pemindahan segera bagi menjamin keselesaan dan keselamatan pelanggan dan kakitangan. Ia telah diluluskan untuk dilaksanakan melalui kaedah perolehan tender terhad pada Disember 2017 dengan kos keseluruhan projek sebanyak RM576,000,000.00 yang diluluskan oleh Kerajaan terdahulu.

Walau bagaimanapun, projek tersebut tidak dapat dilaksanakan berikutan keputusan Kerajaan melalui surat bertarikh 29 Jun 2018 yang telah mengarahkan agar semua perolehan secara tender terhad dan rundingan terus yang belum dikeluarkan Surat Setuju Terima (SST), pelaksanaannya hendaklah dibatalkan. Penilaian semula ke atas keperluan pelaksanaan projek perlu dibuat oleh Kementerian / Agensi dan ditender semula secara tender terbuka atau tender terbuka pra-kelayakan.

Mengambil kira faktor kesegeraan demi kepentingan awam, Kerajaan pada 26 Julai 2019 telah memutuskan untuk meneruskan pelaksanaan projek bagi memastikan perkhidmatan Kerajaan tidak terjejas serta mengambil kira pelbagai justifikasi termasuk pertimbangan khas oleh Kerajaan. Terkini, harga yang ditawarkan oleh syarikat pada hujung bulan Oktober 2019 adalah sebanyak RM400,000,000.00 selepas proses rundingan semula harga.

Memandangkan bahawa projek ini diteruskan selepas mendapat permintaan pelbagai pihak daripada negeri Kelantan termasuk pemimpin tertinggi negeri, maka proses rundingan dengan potongan harga besar telah dijalankan, yang tidak akan dinikmati sekiranya tidak berlakunya pertukaran Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN PANG HOK LIONG
[LABIS]
TARIKH : 23 OKTOBER 2019 (RABU)

SOALAN NO. 25

Y.B. TUAN PANG HOK LIONG [LABIS] minta **MENTERI KEWANGAN** menyatakan apakah langkah positif akan diambil untuk menyakinkan atau memaksa institusi-institusi perbankan untuk melonggarkan pemberian kemudahan pinjaman kepada syarikat-syarikat, peniaga-peniaga dan pembeli-pembeli hartanah supaya ekonomi dapat dirangsang.

JAWAPAN

Tuan Yang di-Pertua,

Untuk makluman Ahli Yang Berhormat, Kerajaan memahami kepentingan akses kepada pembiayaan yang berterusan serta peranan kredit dalam menyokong pertumbuhan ekonomi. Garis panduan yang ditetapkan oleh Bank Negara Malaysia (BNM) memberikan panduan tentang prinsip-prinsip pemberian pembiayaan yang berhemat dan bertanggungjawab. Walau bagaimanapun, keputusan untuk memberikan pinjaman adalah ditentukan oleh institusi kewangan sendiri berdasarkan analisis risiko kredit. Sebagai pengantara yang memudahkan aliran dana pendeposit kepada peminjam, institusi kewangan juga mempunyai tanggungjawab fidusiari untuk memastikan deposit daripada orang ramai adalah terpelihara. Oleh itu, sebarang pinjaman yang dibuat menggunakan dana pendeposit perlu dilakukan secara berhemat.

Sehubungan itu, penilaian daripada BNM menunjukkan bahawa keadaan pembiayaan keseluruhan terus menyokong aktiviti ekonomi, di mana perniagaan yang berdaya maju dan peminjam yang layak kekal menerima pembiayaan daripada institusi kewangan. Bagi tempoh Januari hingga Ogos 2019, pengeluaran pinjaman oleh institusi kewangan adalah tinggi, iaitu RM840.9 bilion. Daripada jumlah ini, RM527.2 bilion adalah kepada sektor perniagaan, manakala RM248.1 bilion adalah kepada sektor isi rumah.

Walaupun bagaimanapun, Kerajaan mengambil maklum bahawa terdapat segmen tertentu, terutamanya di kalangan perusahaan kecil dan sederhana (PKS) dan pembeli rumah, yang menghadapi masalah dalam mengakses pembiayaan. Untuk membantu segmen ini, beberapa inisiatif baharu telah diperkenalkan oleh BNM termasuk:

- i. Bagi usahawan atau pembeli harta tanah yang tidak berjaya mendapatkan pembiayaan, mereka boleh memanfaatkan Khidmat Nasihat Pembiayaan (MyKNP). Inisiatif ini merupakan usahasama oleh

NO SOALAN : 25

BNM, Credit Guarantee Corporation Malaysia Berhad (CGC) dan Agensi Kaunseling dan Pengurusan Kredit (AKPK), dengan sokongan industri kewangan yang bertujuan untuk menambah baik pengalaman pemohon pembiayaan, termasuk menyediakan kefahaman yang lebih mendalam mengenai faktor-faktor yang mempengaruhi permohonan pembiayaan mereka serta membantu meningkatkan kelayakan mereka untuk mendapatkan pembiayaan pada masa hadapan;

- ii. PKS juga boleh mendapatkan bantuan penyusunan atau penjadualan semula pinjaman (*restructuring and rescheduling*) melalui Skim Penyelesaian Pinjaman Kecil di bawah BNM. Mulai 1 Oktober 2019, kelayakan dibuka kepada PKS yang telah tidak beroperasi;
- iii. Fleksibiliti juga diberikan untuk menggalakkan institusi kewangan membantu usahawan yang berdaya maju melalui penyusunan dan penjadualan semula pembiayaan yang lebih proaktif;
- iv. Syarat kelayakan Dana Rumah Mampu Milik BNM dengan peruntukan sebanyak RM1 bilion telah diperluas, di mana pendapatan bulanan isi rumah telah ditingkatkan kepada RM4,360, manakala harga maksimum rumah yang layak mendapat pembiayaan dinaikkan kepada RM300,000. Di bawah Dana ini, kadar pembiayaan yang dikenakan adalah rendah, iaitu tidak melebihi 3.5% setahun, dan tempoh maksimum pembiayaan adalah sehingga 40 tahun;
- v. Portal Rumahku oleh AKPK memberikan pendidikan celik kewangan kepada pemohon pembiayaan rumah mampu milik, supaya golongan ini lebih memahami hak serta obligasi mereka sebelum mendapatkan pinjaman daripada bank; dan
- vi. BNM, Suruhanjaya Sekuriti, CGC dan institusi kewangan telah mengadakan bengkel perkongsian maklumat kepada lebih daripada 70 kaunselor perniagaan SME Corp dan TEKUN untuk membina keupayaan mereka dalam memberikan khidmat nasihat kewangan yang holistik kepada PKS.

Langkah-langkah di atas melengkapi inisiatif sedia ada untuk mempertingkatkan akses pembiayaan seperti yang berikut:

NO SOALAN : 25

- i. Jaminan kredit disediakan kepada usahawan dan pembeli rumah yang ingin mendapatkan pembiayaan daripada institusi kewangan tetapi tidak mempunyai cagaran (bagi usahawan) atau rekod prestasi. Jaminan kredit ini ditawarkan melalui CGC dan Syarikat Jaminan Pembiayaan Perniagaan bagi PKS, dan Cagamas Berhad dan Syarikat Jaminan Kredit Perumahan bagi pembeli rumah;
- ii. Platform rujukan pinjaman/pembiayaan PKS pertama di Malaysia iaitu “imSME” oleh CGC yang memadankan PKS dengan pelbagai produk pinjaman/pembiayaan bersesuaian dengan keperluan perniagaan. Sekiranya tiada padanan, pemohon akan dirujuk kepada Penasihat Kewangan imSME untuk khidmat nasihat selanjutnya;
- iii. Tabung BNM untuk PKS bagi membantu PKS yang layak mendapatkan pembiayaan pada kadar yang lebih rendah daripada pasaran. Pada masa ini, sejumlah RM3.7 bilion masih lagi tersedia di bawah Tabung ini untuk dimanfaatkan oleh PKS; dan
- iv. Usahawan mikro boleh mendapatkan pembiayaan untuk perniagaan mereka di bawah Skim Pembiayaan Mikro melalui 10 institusi perbankan dan institusi kewangan pembangunan. Skim ini menawarkan pembiayaan tanpa cagaran sehingga RM50,000.

**MESYUARAT KETIGA, PENGGAL KEDUA
PARLIMEN KEEMPAT BELAS
PEMBERITAHUAN PERTANYAAN
DEWAN RAKYAT MALAYSIA**

PERTANYAAN : LISAN
DARIPADA : YB DATUK SYED ABU HUSSIN BIN HAFIZ SYED
ABDUL FASAL
KAWASAN : BUKIT GANTANG
TARIKH : 23 OKTOBER 2019 (RABU)

SOALAN :

YB DATUK SYED ABU HUSSIN BIN HAFIZ SYED ABDUL FASAL minta **MENTERI KERJA RAYA** menyatakan kemajuan terkini, tempoh kebolehsiapan dan tarikh boleh guna pakai:

- (a) Lebuhraya Pantai Barat (Banting Ke Changkat Jering, Taiping); dan
- (b) projek naik taraf laluan FT60 dari Damar Laut ke Changkat Jering.

JAWAPAN :

Tuan Yang Di-Pertua,

Untuk makluman Ahli Yang Berhormat Senator, jajaran Lebuhraya Persisiran Pantai Barat (WCE) ini merentasi dua (2) buah negeri iaitu Negeri Selangor dan Negeri Perak sejauh 315.5 kilometer dibina di sepanjang persisiran Pantai Barat untuk kemudahan penduduk setempat dan juga pengguna lebuhraya ke utara. Kerja-kerja pembinaan keseluruhan projek lebuhraya WCE ini telah dibahagikan kepada 2 kaedah, iaitu seperti berikut:-

1) Kaedah penswastaan bertol : Kerja-kerja pembinaan dilaksanakan oleh pihak konsesi West Coast Expressway Sdn. Bhd., iaitu jajaran baharu sepanjang 233 kilometer, bermula dari Jalan B18 Banting – KLIA, dan berakhir di Persimpangan Bertingkat Tanjong Karang, Selangor. Manakala, di negeri Perak pula, ia bermula dari Jambatan Sungai Bernam di Hutan Melintang dan berakhir berhampiran Plaza Tol Changkat Jering, Lebuhraya Utara - Selatan (PLUS).

2) Kaedah konvensional JKR : iaitu melibatkan skop menaiktaraf Jalan Persekutuan 5 atau FR5 yang sedia ada sepanjang 82.5 kilometer, bermula dari Tanjong Karang, Selangor ke Hutan Melintang, Perak (50 kilometer) dan dari Teluk Intan, ke Kampung Lekir, Perak (32.5 kilometer).

Tuan Yang Di-Pertua,

Status kemajuan terkini penyiapan Lebuhraya Pesisiran Pantai Barat (WCE) di bawah skop penswastaan sehingga 15 September 2019 adalah 66.0%. Bagi kemajuan secara terperinci mengikut negeri pula adalah 82.0% bagi Negeri Perak manakala 55.7% bagi Negeri Selangor.

Aktiviti pembinaan lebuhraya kini sedang giat dilaksanakan yang melibatkan seperti kerja-kerja pembersihan tanah, penambahan tanah,

pembinaan struktur jambatan, penurapan jalan dan pemasangan perabot jalan.

Jajaran lebuh raya ini telah mula dibuka secara berperingkat mengikut penyiapan bermula tahun 2019 iaitu pembukaan pertama pada 31 Mei 2019 dari Persimpangan Hutan Melintang ke Persimpangan Teluk Intan dan pembukaan kedua pada 23 September 2019 melibatkan jajaran dari Persimpangan Kg. Lekir ke Persimpangan Beruas.

Tuan Yang Di-Pertua,

Untuk makluman Ahli Yang Berhormat, terdapat 2 pakej Projek Naiktaraf Laluan FT60 dari Damar Laut ke Changkat Jering yang dalam peringkat pelaksanaan. Bagi Pakej 1 iaitu dari Batu Tiga ke Segari, kemajuan terkini projek adalah sebanyak 67.0% dan dijangka siap pada 10 Februari 2020. Manakala bagi Pakej 2 pula dari Segari ke Tebok Yan pula, kemajuan terkini adalah sebanyak 69.0% dan dijangka siap pada 28 Februari 2020. Tarikh boleh guna laluan ini adalah bergantung kepada tarikh penyiapan sebenar projek ini sebelum ianya dibuka pada orang ramai.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. TUAN RAMKARPAL SINGH A/L KARPAL SINGH
[BUKIT GELUGOR]
TARIKH : 23 OKTOBER 2019 (RABU)

SOALAN NO. 27

Y.B. TUAN RAMKARPAL SINGH A/L KARPAL SINGH [BUKIT GELUGOR] minta **MENTERI KEWANGAN** menyatakan sama ada Projek Bangunan Gunasama Persekutuan di Tunjong, Kota Bharu diluluskan oleh bekas Perdana Menteri sewaktu BN menjadi *caretaker government* dan sekiranya ya, sama ada bekas kelulusan tersebut merupakan cara berkempen oleh bekas Perdana Menteri tersebut bagi pihak Barisan Nasional.

JAWAPAN

Tuan Yang di-Pertua,

Projek pembinaan Bangunan Gunasama Persekutuan Kota Bharu, Tunjong, Kelantan telah dirancang untuk dilaksanakan sejak tahun 2016 lagi dan perlu dilaksanakan segera kerana bangunan sedia ada terlalu usang dan memerlukan pemindahan segera bagi menjamin keselesaan dan keselamatan pelanggan dan kakitangan. Ia telah diluluskan untuk dilaksanakan melalui kaedah perolehan tender terhadap Disember 2017 dengan kos keseluruhan projek sebanyak RM576,000,000.00 yang diluluskan oleh Kerajaan terdahulu.

Walau bagaimanapun, projek tersebut tidak dapat dilaksanakan berikutan keputusan Kerajaan melalui surat bertarikh 29 Jun 2018 yang telah mengarahkan agar semua perolehan secara tender terhadap dan rundingan terus yang belum dikeluarkan Surat Setuju Terima (SST), pelaksanaannya hendaklah dibatalkan. Penilaian semula ke atas keperluan pelaksanaan projek perlu dibuat oleh Kementerian / Agensi dan ditender semula secara tender terbuka atau tender terbuka pra-kelayakan.

Mengambil kira faktor kesegeraan demi kepentingan awam, Kerajaan pada 26 Julai 2019 telah memutuskan untuk meneruskan pelaksanaan projek bagi memastikan perkhidmatan Kerajaan tidak terjejas serta mengambil kira pelbagai justifikasi termasuk pertimbangan khas oleh Kerajaan. Terkini, harga yang ditawarkan oleh syarikat pada hujung bulan Oktober 2019 adalah sebanyak RM400,000,000.00 selepas proses rundingan semula harga.

Memandangkan bahawa projek ini diteruskan selepas mendapat permintaan pelbagai pihak daripada negeri Kelantan termasuk pemimpin tertinggi negeri, maka proses rundingan dengan potongan harga besar telah dijalankan, yang tidak akan dinikmati sekiranya tidak berlakunya pertukaran Kerajaan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : JAWAB LISAN
DARIPADA : TUAN ARTHUR JOSEPH KURUP
[PENSIANGAN]
TARIKH : 23.10.2019 (RABU)
SOALAN : 28

minta **MENTERI PEMBANGUNAN LUAR BANDAR** menyatakan langkah untuk memperkenalkan industri baru kepada petani dan pekebun luar bandar supaya tidak hanya bergantung kepada penanaman sawit dan getah.

JAWAPAN:

Tuan Yang di-Pertua,

1. Pelbagai program telah dibuat oleh Kementerian dalam usaha untuk menaiktaraf kehidupan penduduk di luar bandar khususnya petani dan pekebun. Antara program telah dilaksanakan oleh Kementerian adalah Projek Bersepadu Pembangunan Ekonomi Kampung (PROSPEK) yang mana PROSPEK ini memberi penekanan kepada ekonomi insitu atau *niche product* sesebuah kampung dengan menggabungkan tanah-tanah terbiar di kampung-kampung yang terlibat secara berskala besar bagi menjana pendapatan peserta serta penduduk setempat. Program yang dirancang ini juga adalah selaras dengan hasrat dan saranan YAB Perdana Menteri yang menekankan bidang pertanian ini perlu dijalankan secara luas/estet untuk menjana pendapatan yang mencukupi. Selain itu juga, konsep penggabungan tanah juga disarankan supaya ladang-ladang ini boleh diuruskan secara sistematik dan berkesan.

NO. SOALAN: 28

2. PROSPEK ini merupakan satu projek yang memberi fokus kepada komponen ekonomi, prasarana asas dan perumahan. Komponen ekonomi ini tidak melibatkan pembukaan ladang getah dan kelapa sawit di kampung-kampung tetapi lebih menumpukan kepada *niche product* di kampung tersebut. Dua projek rintis telah dilaksanakan pada tahun 2018 iaitu di PROSPEK Rintis Kg. Sidam, Kulim, Kedah dan PROSPEK Rintis Kg. Pasir Raja di Daerah Dungun Terengganu. Untuk makluman Yang Berhormat, PROSPEK Rintis Kg. Sidam ini yang dilaksanakan oleh KEDA akan menumpukan kepada tanaman jagung (keluasan 50 ekar) sebagai *niche product*. Melalui tanaman jagung ini, pelbagai produk hiliran jagung dapat dihasilkan seperti penghasilan silaj, jagung lerai, bertih jagung dan sebagainya. Manakala bagi PROSPEK Rintis Kg. Pasir Raja, Dungun, Terengganu pula menumpukan kepada penternakan ikan air tawar (lebih 50 kolam) sebagai komponen ekonomi utama sebelum diproses menjadi produk hiliran yang akan dipantau oleh agensi KETENGAH.
3. Kementerian juga bekerjasama dengan agensi-agensi seperti Jabatan Pertanian, FAMA, Perikanan dan lain-lain bagi membantu penduduk kampung yang terlibat di bawah PROSPEK ini dari aspek khidmat nasihat, input-input pertanian, perikanan, keusahawanan dan sebagainya.
4. Kementerian juga akan memastikan projek ekonomi di bawah PROSPEK ini dapat diteruskan untuk jangka masa yang lama dengan menyediakan pelan rangkaian perniagaan yang lengkap.
5. Selain itu juga, PROSPEK turut memberi fokus kepada pembangunan komponen Prasarana Asas dengan penyediaan infrastruktur asas seperti lampu jalan dalam kampung, jalan perhubungan dalam kampung dan kemudahan sosial asas serta komponen Perumahan yang dapat memberi manfaat kepada penduduk di kampung-kampung yang terlibat.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : JAWAB LISAN
DARIPADA : TUAN SANISVARA NETHAJI RAYER A/L
RAJAJI [JELUTONG]
TARIKH : 23 OKTOBER 2019 (RABU)

SOALAN NO. 29

Tuan Sanisvara Nethaji Rayer A/L Rajaji [Jelutong] minta **MENTERI KOMUNIKASI DAN MULTIMEDIA** menyatakan bilakah masalah rangkaian kesinambungan internet yang memuaskan akan dijangkau di kawasan Jelutong, Pulau Pinang bagi mengatasi masalah sambungan jalur rangkaian internet yang kurang memuaskan.

JAWAPAN:

Tuan Yang di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) melalui Suruhanjaya Komunikasi dan Multimedia Malaysia (SKMM) telah menjalankan pengukuran di kawasan-kawasan di Pulau Pinang pada Jun 2019 termasuklah di dua (2) tempat di kawasan Jelutong.
2. Berdasarkan kajian dan pengukuran ini, Maxis telah mencatatkan purata kelajuan muat turun yang tertinggi iaitu 27.3 Megabit sesaat (Mbps) manakala Digi mencatatkan kedua tertinggi dengan 19.2 Mbps. Ini diikuti oleh Celcom dengan catatan purata kelajuan muat turun sebanyak 18.7 Mbps, YTL 15.3 Mbps dan U Mobile setinggi 12.6 Mbps. Manakala TM/Webe pula mencatatkan purata kelajuan muat turun sebanyak 11.00 Mbps.
3. Bagi masalah-masalah sambungan rangkaian jalur internet yang kurang memuaskan, SKMM memerlukan maklumat yang lebih spesifik, mengenai jenis rangkaian, pemberi perkhidmatan dan kawasan yang mempunyai masalah tersebut bagi menjalankan pemantauan lanjut.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : JAWAB LISAN
DARIPADA : DATO' SRI BUNG MOKTAR BIN RADIN
[KINABATANGAN]
TARIKH : 23 OKTOBER 2019 (RABU)

SOALAN NO. 30

PR-1423-L05887

Dato' Sri Bung Moktar bin Radin [Kinabatangan] minta **MENTERI KOMUNIKASI DAN MULTIMEDIA** menyatakan apakah usaha pihak Kementerian dalam menyediakan rangkaian telekomunikasi di kawasan-kawasan pedalaman yang masih belum mendapat capaian talian telekomunikasi terutamanya di dalam kawasan Parlimen Kinabatangan.

JAWAPAN:

Tuan Yang di-Pertua,

1. Untuk makluman Ahli Yang Berhormat, Kementerian Komunikasi dan Multimedia Malaysia (KKMM) sentiasa berusaha menambahbaik kualiti perkhidmatan komunikasi di seluruh negara termasuklah di Parlimen Kinabatangan.
2. Melalui inisiatif yang dibiayai menerusi Kumpulan Wang Pemberian Perkhidmatan Sejagat (PPS), peluasan Liputan Jalur Lebar Talian Tetap dan Jalur Lebar Mudah Alih yang merangkumi pembinaan menara komunikasi baharu dan penaiktarafan menara komunikasi sedia ada dengan perkhidmatan jalur lebar mudah alih giat dilaksanakan di seluruh negara termasuk di Parlimen Kinabatangan.
3. Di bawah projek Jalur Lebar Pinggir Bandar dan Luar Bandar yang menyediakan perkhidmatan jalur lebar talian tetap dengan kelajuan sehingga 20 Megabit sesaat, sebanyak 620 ribu sambungan tersedia di seluruh negara termasuk 160 sambungan tersedia di Parlimen Kinabatangan.
4. Bagi inisiatif Peluasan Liputan Jalur Lebar Mudah Alih, sebanyak 2,397 menara komunikasi baharu telah siap dibina dan beroperasi dengan liputan 3G/4G dan 5,128 menara sedia ada juga telah berjaya dinaiktaraf di seluruh negara. Daripada jumlah ini, sebanyak 73 buah menara baharu dan 147 lokasi menara yang telah siap di naiktaraf adalah terletak di Parlimen Kinabatangan.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA
PARLIMEN KEEMPAT BELAS**

PERTANYAAN : LISAN
DARIPADA : PUAN NOR AZRINA BINTI SURIP
[MERBOK]
TARIKH : 23 OKTOBER 2019
[RABU]

SOALAN NO. 31

Minta **MENTERI PERUMAHAN DAN KERAJAAN TEMPATAN** menyatakan jumlah sisa pepejal haram yang berada dalam pengetahuan pihak Kementerian dan apakah kaedah yang diambil bagi menyelesaikan masalah sisa pepejal ini.

JAWAPAN :

Tuan Yang di-Pertua,

1. Untuk makluman Yang Berhormat, sisa haram merujuk kepada sisa yang dilonggokkan, diolah, disimpan, distorkan atau dilupuskan di tempat yang tidak dibenarkan di bawah Akta Pengurusan Sisa Pepejal dan Pembersihan Awam 2007 (Akta 672) atau mana-mana peraturan-peraturan di bawah Akta 672.
2. Untuk makluman, sejak tahun 2016 sehingga Ogos 2019, jumlah sisa haram yang direkodkan oleh pihak Kementerian dianggarkan sebanyak 23,796 tan melibatkan 1,103 lokasi.

3. Kebanyakan jenis sisa haram tersebut terdiri daripada sisa binaan yang dilonggokkan seperti sisa perobohan, batu, simen, pasir, kayu dan lain-lain. Selain itu, terdapat juga sisa industri seperti botol-botol kilang, palet, sisa pembungkusan dan lain-lain.

Pembasmian sisa haram

1. Kaedah yang diambil oleh Kementerian bagi menyelesaikan masalah sisa haram adalah seperti berikut:
 - i. Menyediakan Pelan Tindakan Menangani Isu Pembuangan Sisa Pepejal Di Lokasi Yang Tidak Dibenarkan (Sampah Haram);
 - ii. Pemasangan papan tanda serta *barrier tape* bagi kawasan yang telah dibersihkan dan berpotensi menjadi lokasi pembuangan sisa haram;
 - iii. Pemantauan secara bersepadu antara Perbadanan Pengurusan Sisa Pepejal dan Pembersihan Awam (SWCorp), Pihak Berkuasa Tempatan (PBT) dan masyarakat setempat dalam membantu memastikan masalah sisa haram tidak berlaku;
 - iv. “Operasi Intip dan Cekup” bagi mengenal pasti mereka yang tidak bertanggungjawab melanggar undang-undang membuang sisa di lokasi yang tidak dibenarkan;
 - v. Anggota penguat kuasa SWCorp mengenal pasti lokasi-lokasi “*hot spot*” yang sering menjadi tumpuan pihak tertentu untuk meningkatkan aktiviti penguatkuasaan di lokasi-lokasi tersebut; dan

- vi. Mengambil tindakan ke atas pesalah yang membuang sisa secara haram mengikut Seksyen 71, Akta 672. Jika disabitkan kesalahan, denda boleh dikenakan tidak kurang daripada RM10,000.00 dan tidak melebihi RM100,000.00 atau dipenjarakan selama tempoh tidak kurang daripada 6 bulan dan tidak melebihi 5 tahun atau kedua-duanya.
2. Untuk makluman Yang Berhormat, menerusi pembasmian lokasi sisa haram dan operasi-operasi yang telah dijalankan oleh Kementerian melalui SWCorp, dari tahun 2016 hingga Ogos 2019 sebanyak 56 kes berkaitan pembuangan sisa haram telah disabitkan kesalahan di bawah Seksyen 71 (1) Akta 672 dengan jumlah denda sebanyak RM765,500.00 membabitkan lokasi-lokasi di Wilayah Persekutuan Kuala Lumpur, Pahang, Negeri Sembilan, Melaka, Johor, Kedah dan Perlis.
3. SWCorp juga telah menubuhkan Unit Operasi dengan kekuatan anggota penguat kuasa terlatih dalam membuat intipan dan serbuan bagi membanteras kewujudan lokasi sisa haram yang baharu dan sisa haram yang berulang.
4. Oleh yang demikian, orang awam diingatkan untuk melupuskan sisa pepejal mengikut tatacara dan peraturan yang telah ditetapkan.
5. Tanggungjawab untuk menjadikan kawasan persekitaran bebas daripada masalah sisa haram merupakan tanggungjawab bersama dan penglibatan orang awam amat perlu supaya lebih bertanggungjawab dengan tidak membuang sisa di tempat yang tidak dibenarkan serta melaporkan kepada pihak berkuasa seperti SWCorp sekiranya mendapat maklumat mengenai pembuangan sisa haram ini.

Sekian, terima kasih.

**PEMBERITAHUAN PERTANYAAN LISAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS**

PERTANYAAN : LISAN
DARIPADA : Y.B. DATO' DR. MOHD KHAIRUDDIN BIN AMAN RAZALI
[KUALA NERUS]
TARIKH : 23 OKTOBER 2019 (RABU)

SOALAN NO. 32

Y.B. DATO' DR. MOHD KHAIRUDDIN BIN AMAN RAZALI [KUALA NERUS]
minta **MENTERI KEWANGAN** menyatakan dasar dan inisiatif yang dilaksanakan bagi menangani kejatuhan mata wang ringgit dan implikasinya terhadap ekonomi dan rakyat di negara ini.

JAWAPAN

Tuan Yang di-Pertua,

Sehingga 14 Oktober 2019, nilai ringgit telah menyusut sebanyak 1.3% berbanding dolar Amerika Syarikat. Prestasi ini adalah sejajar dengan pergerakan kebanyakan mata wang serantau lain yang telah berubah nilai dalam lingkungan -6.2% dan 6.3% berbanding dolar Amerika Syarikat (AS). Penyusutan nilai ringgit disebabkan oleh ketidaktentuan berkaitan perkembangan geopolitik, kemerosotan sentimen pelabur dalam pasaran kewangan dunia berikutan kelemahan unjuran pertumbuhan global.

Kadar pertukaran ringgit yang fleksibel memainkan peranan yang penting sebagai penyerap kejutan luaran tanpa menjejaskan aktiviti ekonomi domestik. Namun begitu, volatiliti ringgit yang ketara boleh menjejaskan aktiviti ekonomi berikutan kesukaran sektor perniagaan dan perindustrian merancang strategi dan mengambil keputusan yang wajar. Kerajaan melalui Bank Negara Malaysia (BNM) sentiasa memastikan keadaan pasaran kewangan lebih lancar dan mengambil langkah proaktif dengan memperkenalkan langkah untuk memastikan kecairan yang mencukupi, pasaran yang berdaya tahan dan mengurangkan aktiviti spekulasi dalam pasaran.

Langkah ini termasuk menetapkan syarat supaya sebahagian besar daripada hasil eksport dalam mata wang asing ditukarkan kepada ringgit bagi meningkatkan mudah tunai wang asing dalam pasaran dalam negeri dan meningkatkan penguatkuasaan ke atas peraturan tukaran asing sedia ada bagi mencegah aktiviti spekulasi mata wang ringgit diniagakan di luar pesisir. Pada masa sama, BNM telah memperkenalkan instrumen pelindung nilai (*hedging instruments*) dan menyediakan fleksibiliti agar peserta pasaran kewangan dan sektor perniagaan boleh melaksanakan pengurusan risiko pendedahan mata wang asing dengan lebih baik.

Berkenaan implikasi kejatuhan mata wang ringgit, pergerakan ringgit memberikan impak berbeza yang mana terdapat sektor dalam ekonomi yang akan mendapat manfaat dan mengalami kerugian. Penyusutan nilai ringgit akan

memberi manfaat kepada eksport pembuatan Malaysia yang menyumbang sekitar 80% daripada jumlah eksport kasar kerana nilai eksport negara akan menjadi lebih murah berbanding negara asing. Penyusutan nilai ringgit juga turut memberi manfaat kepada industri pelancongan seterusnya memberi impak positif kepada akaun semasa dalam imbalan pembayaran negara.

Namun demikian, penyusutan nilai ringgit akan menyebabkan peningkatan kos pengeluaran berikutan harga bahan mentah yang diimport dari luar negara menjadi lebih mahal. Walau bagaimanapun, kesannya terhadap kadar inflasi adalah kecil. Dalam tempoh Januari hingga Ogos 2019, inflasi hanya mencatatkan peningkatan sebanyak 0.5 peratus berikutan harga minyak petrol dan diesel yang lebih rendah berbanding tahun lepas.

Meskipun keadaan persekitaran luar semakin mencabar, ekonomi Malaysia kekal berdaya tahan dengan mencatat pertumbuhan 4.7 peratus dalam tempoh separuh pertama 2019. Momentum pertumbuhan ekonomi negara dijangka terus kukuh dan berkembang 4.7 peratus pada 2019 disokong asas ekonomi yang kekal mampan termasuk kadar pengangguran dan inflasi yang rendah, rizab antarabangsa yang kekal tinggi dan sistem kewangan yang kukuh. Di samping itu, diversifikasi perdagangan yang luas dari segi destinasi dan produk turut membantu meningkatkan daya tahan ekonomi negara. Malaysia juga kekal sebagai destinasi pilihan utama bagi pelabur asing. Dari aspek pelaburan asing yang diluluskan, sejumlah RM49.5 bilion nilai pelaburan telah diluluskan antara Januari hingga Jun 2019, iaitu peningkatan 97.2% berbanding RM25.1 bilion dalam tempoh sama pada 2018. Dari segi pelaburan asing langsung sebenar seperti yang dicatatkan dalam dokumen Imbalan Pembayaran, Malaysia telah berjaya menarik pelaburan langsung asing sebenar berjumlah RM26.1 bilion dalam tempoh separuh pertama 2019 berbanding RM15.5 bilion dalam tempoh sama pada 2018.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS (2019)

PERTANYAAN : LISAN
DARIPADA : YB. DATUK HAJI AHMAD JAZLAN BIN
YAAKUB [MACHANG]
TARIKH : 23 OKTOBER 2019

SOALAN :

Minta **MENTERI PELANCONGAN, SENI DAN BUDAYA** menyatakan apakah mekanisme yang digunapakai oleh pihak Kementerian dalam mengawal agensi pelancongan umrah dan haji agar tidak mengenakan caj berlebihan susulan daripada langkah Kerajaan Arab Saudi mengenakan caj tambahan visa umrah.

JAWAPAN:

Untuk makluman Ahli Yang Berhormat, bermula musim umrah 1441 Hijrah, pihak Kerajaan Arab Saudi telah memperkenalkan caj Visa Umrah ke atas semua jemaah umrah termasuklah daripada Malaysia. Kadar caj yang dikenakan adalah SR300. Pengenaan caj standard ini menggantikan surcaj SR2000 yang dikenakan Kerajaan Arab Saudi ke atas jemaah umrah ulangan yang dikenakan pada musim umrah yang lalu.

Pihak Kementerian pada masa ini sedang mengkaji dan memantau bagaimana industri sedang bertindak balas kepada pelaksanaan perkara ini sebelum syor atau dapatan bersesuaian diusulkan kepada pihak pemain industri. Berdasarkan pemerhatian awal, didapati rata-rata semua pemain industri akan memindahkan caj ini kepada pengguna. Syarikat pengendali yang telah menjual pakej terlebih dahulu sebelum pelaksanaan caj Visa Umrah ini perlu melaksanakan tanggungjawab dengan menjelaskan kepada jemaah mengenai pengenalan caj baharu ini.

Selain itu, pihak jemaah umrah terlibat juga perlu membuat semakan perincian pakej yang telah dibeli sebelum ini termasuklah pengenaan caj Visa Umrah yang telah pun dibuat terlebih dahulu. Sekiranya jemaah tidak berpuas hati dengan caj tambahan yang dikenakan, pihak jemaah dipohon untuk membuat aduan kepada pihak Kementerian untuk diambil tindakan lanjut oleh pihak Kementerian.

Sekian, terima kasih.

PEMBERITAHUAN PERTANYAAN DEWAN RAKYAT
MESYUARAT KETIGA, PENGGAL KEDUA,
PARLIMEN KEEMPAT BELAS

PERTANYAAN : JAWAB LISAN
DARIPADA : TUAN AHMAD FADHLI BIN SHAARI
[PASIR MAS]
TARIKH : 23 OKTOBER 2019 (RABU)

SOALAN NO. 34

Tuan Ahmad Fadhli bin Shaari [Pasir Mas] minta **MENTERI KOMUNIKASI DAN MULTIMEDIA** menyatakan apakah langkah persediaan yang diambil Kementerian dalam berhadapan isu keselamatan yang mungkin timbul dalam proses pelaksanaan teknologi generasi kelima (5G) di Malaysia.

JAWAPAN:

Tuan Yang di-Pertua,

1. Untuk makluman Ahli Yang Berhormat, Teknologi 5G merupakan evolusi teknologi komunikasi mudah alih terkini yang mampu menawarkan kelajuan akses jalur lebar yang lebih tinggi, kebolehpercayaan penyambungan yang lebih baik, serta kesalinghubungan yang lebih meluas berbanding teknologi komunikasi mudah alih semasa. Pelaksanaan teknologi 5G di Malaysia dilihat mampu mencorak pelaksanaan perniagaan dan

industri negara bagi memacu ekonomi digital negara sebagai enjin pertumbuhan baharu.

2. Antara inisiatif pihak Kerajaan sebagai persediaan negara menuju ke era teknologi 5G adalah melalui penubuhan Pasukan Petugas Khas 5G Negara pada November 2018 yang lalu. Penubuhan pasukan petugas khas ini adalah satu inisiatif libat urus untuk mencadangkan syor-syor serta strategi pelaksanaan teknologi 5G di Malaysia, termasuklah daripada sudut keselamatan.
3. Keahlian Pasukan Petugas Khas 5G Negara terdiri daripada wakil pihak Kerajaan, dan pihak swasta seperti berikut:
 - a) Sektor penawaran (*supply side*) - pemegang-pemegang lesen di bawah Akta Komunikasi dan Multimedia 1998, pengeluar dan pengedar peralatan;
 - b) Sektor permintaan (*demand side*) - industri-industri pembuatan lain, penyelidikan, pembangunan dan perdagangan;
 - c) Kementerian/jabatan/agensi kerajaan; dan
 - d) Ahli akademik, perunding, badan bukan kerajaan, dan lain-lain.
4. Melalui Pasukan Petugas Khas 5G Negara, pihak Agensi Keselamatan Siber Negara (*National Cybersecurity Agency* atau NACSA) dengan kerjasama Suruhanjaya Komunikasi dan Multimedia Malaysia (SKMM) dan penyedia-penyedia rangkaian sedang mengenal pasti risiko serta isu keselamatan yang mungkin timbul dan langkah-langkah yang perlu diambil dalam menanganinya.

5. Syor-syor tersebut akan diangkat dalam laporan Pasukan Petugas Khas 5G Negara yang dijangka akan dibentangkan menjelang akhir 2019 untuk pertimbangan pihak Kerajaan, yang mana ianya akan turut mencakupi aspek pemakaian standard keselamatan antarabangsa, penambahbaikan kod teknik industri, serta penilaian keselamatan bagi produk-produk serta solusi 5G daripada para pembekal teknologi.
6. Langkah-langkah yang diambil ini adalah antara persediaan bagi mengurus dan menangani risiko serta isu keselamatan yang mungkin timbul dalam pelaksanaan teknologi 5G di Malaysia.
7. Selain daripada itu, pihak SKMM juga telah bekerjasama dengan *Malaysian Technical Standard Forum Berhad (MTSFB)*. MTSFB merupakan sebuah forum teknikal bagi industri komunikasi dan multimedia, yang telah membangunkan standard-standard bagi memperkasakan tahap keselamatan rangkaian komunikasi di Malaysia. Standard-standard tersebut adalah seperti berikut:
 1. *Requirements for Information and Network Security.*
 2. *Business Continuity Management System (BCMS).*
 3. *Information Security Incident Management.*
 4. *Security Posture Assessment (SPA).*
8. Standard-standard ini adalah tergunapakai bagi konteks teknologi 5G, serta teknologi-teknologi yang selainnya.